

Kyaamz Markus

Traz Yohn an aez teuk srucz omz

(Matthe 3:1-12, Lukas 3:1-18, Yohn 1:19-28)

1 An ni naeh seun teungz reu oiz rak lawng Yesuhz Khriis, Kuanz Phraz Pen Caoh. Mony reu ma Phraz Pen Caoh, an taemz mok tuh z kyaamz ihz taangz phraz Isaiah ne daz,

“Teuk ngarz raez! Ohz ngaz cao lan ihz phuhz reu oiz Ohz aacz Mih, an ngaz meu rae reung dengz Mih ne.
3 Reus ihz hawkz an raak tuh z ruk daz, ‘Meu rae reung dengz Phraz Cen Cen, aez reung dengz keu sangz ta Hnhz nuar.’”

4 Reus ihz hawkz an raak ne naeh Yohn, hnhz truz aez teuk srucz omz tuh z ruk. Hnhz rawz tang traz aez ihz seuk weur phawmz daehz boh leh teuk srucz. Beuk cih ceun diz, Phraz Pen Caoh ngaz plawiz reung dengz kawi pehz. Ihz weng Yerusalem tang ihz prih Yio tang heungz truz cu Yohn. Keuh teur aacz daehz lao plaerz reung dengz kawi daehz, keuh leh teuk srucz a hnhz tuh z omz Yordan.

6 Tahz Yohn kap kreung an leh hukz meu rang maang soz cih. Hnhz leh seum mat hurz mat peur ngeun daehz, suamz caarz **7** boh ngaam ceun ngur ruk. Yohn rawz plaerz daz, “Ihz an truz thaz puatz ohz ne mawh myaat lak ohz. Ohz an ni nam theukz seuk deumz khawz tang nuarz cawng khlapz

8 Hnhz. Ohz aez pehz nahz teuk srucz tuh z omz pan, Tahz an diz samz aez pehz nahz teuk srucz tuh z Khuanz Seu Ngamz.”

Yesuhz leh teuk srucz omz boh khaam reung dengz kyaam ya

(Matthe 3:13-4:11, Lukas 3:21-22, 4:1-13)

9 Meuz diz Yesuhz truz thaz prih Kalile weng Nasaret, leh teuk srucz a Yohn tuh z **10** omz Yordan. Meuz Hnhz lae truz thaz omz ne, Hnhz awlz plengz plakz haakz, Khuanz Phraz cur cu kaai Hnhz naeh ceun ploiz **11** ne. Meuz diz, reus rawhz truz thaz kaang raaaz ne daz, “Mih naeh Kuanz an Ohz yaw, an Ohz trohz phawmz.”

12 Waaiz an diz, Khuanz Phraz phuhz **13** Yesuhz lan luat tuh z ruk. Hnhz moh tuh z ruk an diz ponz kawlz seu ngihz, Satan kyaam ya Hnhz. A diz maang tang toz ruk rai keui, keuz daz teu maan kaang raaaz keui truz lum la Hnhz.

Yesuhz raak tahz kahz keu ponz

(Matthe 4:1-11, Lukas 4:1-13)

14 Waaiz Yohn klaerz khawz ne, Yesuhz truz cu mial prih Kalile, rawz traz reu oiz rak **15** Phraz Pen Caoh daz, “Kraao a wa phraeoz, kraao prih Phraz Pen Caoh a wa thatz tae! Teur aacz daehz caanz reung dengz kawi raez, yum reu oiz rak raez!”

¹⁶ Meuz Yesuhz nuar boh waar nawngz Kalile ne, Hnhz awlz tahz kahz kuanz mai keu aarz, Simon kaar Andre, kaar yeung rup boh kahz tuhز nawngz kawp daz kaar ¹⁷ naeh tahz kahz. Yesuhz daz kaar nahz, “Lan tawiz Ohz raez. Ohz ngaz cih paarz ¹⁸ naeh tahz kahz khahz ihz.” Kaar kaw mok thengz luat rup daehz, lan tawiz Hnhz. ¹⁹ Peun lan thaengz a diz nyaenz, Hnhz awlz Yakop kaar Yohn, an naeh kuanz Sebede, yeung meu rae boh rup daehz tuhز ceun ²⁰ luang. Yesuhz raak leh luat kaar aez kaar lan tawiz Daehz, kaar kaw lan tawiz Hnhz, mok thengz paz daehz Sebede boh ihz suamz caangz tuhز ceun luang.

Yesuhz wah thengz phiz

(Lukas 4:31-37)

²¹ Yesuhz boh teu paez Hnhz keui lan weng Kapernaum. Meuz phraeoz truz seu ngihz sinz, Hnhz kut tuhز crawl rawz traz, ²² sawnz aez ihz keui nahz. Ihz keui teur aacz daehz sangz baaiz an Hnhz sawnz, kawp daz an Hnhz sawnz ne naeh ceun ihz maang a na, nam naeh ceun sra mawz kyaamz. ²³ Meuz diz luat, tuhز crawl rawz traz ne maang ihz phiz kut hawkz. Ihz an diz raak ²⁴ daz, “Euz! Yesuhz, ihz weng Nasaraet, cih naehz Tahz ehz truz cu ehz a? Ngaz truz ya ehz haz? Tahz ehz naeh yaeh ehz mas boh. Tahz ehz naeh Tahz an seu ngamz, an truz thaz Phraz Pen Caoh.” ²⁵ Yesuhz wah thengz phiz, lao daz, “Moh pras pras, lae lan thaz ihz an ni”.

²⁶ Phiz an diz kaw cih aez ihz an diz raw, ²⁷ raak usz usz lae lan thaz ihz an diz. Ihz hacz aamz kaw sangz baaiz teur daz daehz nahz, “An ni naeh seu naez ez? Traz teun mehز meoz an nae ez? Ehз nam ti awlz traz an maang a na ceun ni. Phiz keui kaw teuk ngarz an Hnhz lao a.” ²⁸ Reu oiz Yesuhz kaw sirz lan luat tuhз prih Kalile hacz aamz.

Yesuhz seuk neum ihz penz

(Matthe 8:14-17, Lukas 4:38-41)

²⁹ Waaiz Yesuhz lae thaz crawl rawz traz ne Yakop kaar Yohn kaw lan tawiz, kut tuhз kaang Simon kaar Andre. Yakop kaar ³⁰ Yohn kaw lan tawiz keuh. Keunz keuh Simon reum yaetz boh a diz. Ihz keui kaw ³¹ lao luat Yesuhz lawng hnhz reum. Yesuhz kaw lan cu hnhz, yawk tihz leh peun rawi, reum hnhz kaw bilz, hnhz kaw cih damz keuh boh. ³² Meuz teuk borz, seu ngihz a wa keutz ne ihz leh ihz penz boh ihz phiz kut keui ³³ truz cu Yesuhz. Ihz tang weng keui kaw ³⁴ bucz boh teun leukz kaang an diz. Yesuhz cih aez ihz penz klawhз meoz keui moh rak, wah thengz thaengz tang phiz. Phiz keui kaw mas boh Yesuhz naeh yaeh. Kawp ceun diz Hnhz nam aez keuh upz naehz.

Yesuhz rawz traz tuhз prih Kalile

(Lukas 4:42-44)

³⁵ Ceun kap siz teuk ngup cao, co prih maat thaangz, Yesuhz rawi lan suz tawngz ti

³⁶ nam maang ihz. Simon boh kuanz boh hnhz keui teur aacz daehz khahz dawmz

³⁷ Hnhz. Meuz a wa awlz Yesuhz ne daz, “Ihz keui teur aacz daehz khahz dawmz boh Mih.”

³⁸ Yesuhz kaw daz, “Han! Ehz lan tawiz pruh an naeh rim keu ni, aez Ohz bawnz rawz traz tawiz keu diz. Kawp ceun ni rae Ohz truz.”

³⁹ Kawp ceun ni Yesuhz lan tawiz tuhz prih Kalile paw sirz rae rawz traz tawiz crawl keui, wah thengz tang phiz keui.

Yesuhz seuk neum ihz tut

(Matthe 8:1-4, Lukas 5:12-16)

⁴⁰ Maang ihz tut hawkz truz seuk deumz aacz ngaai Yesuhz maanyz daz, “Tahz, beuk Mih sunz kaw cih aez ohz rak.”

⁴¹ Yesuhz kaw teur yawng hnhz, teuk yawr tihz Daehz rae teu hnhz daz, “Ohz sunz

⁴² boh, aez mih rak.” Meuz diz luat tut hnhz

⁴³ kaw a wa rak. Yesuhz kaw lao seumz mawn

⁴⁴ mawn rae cao hnhz lan luat, “Yak lao yaeh nahz lawng an ni. Keuiz daz lan cu saangz longz plaetz toz mih. Pukz caw kreung lu ceun Moses seumz mok, aez naeh saak se aacz ngaai ihz, ta mih a wa seu ngamz.”

⁴⁵ Keuiz daz hnhz lae lan lao plaetz lawng daehz paw sirz. Kawp ceun diz, Yesuhz nam caang kut tuhz weng saang raang leui. Hnhz bawnz moh thaz nawk weng ti seun tapz ihz boh. Keuiz daz ihz klawh ti keui teur aacz daehz truz cu Hnhz.

Yesuhz aez ihz tihz yawng yam ne bilz

(Matthe 9:1-8, Lukas 5:17-26)

2 Naeh thaengz seu seu ngihz, meuz Yesuhz weng tawz weng Kapernaum ne, ihz keui ngarz reu oiz Hnhz weng truz lang kaang. Ihz keui teur aacz daehz truz neuk tuhz kaang thanz paw nam maang ti nuar, tawiz teun leukz kaang kaw neuk. Yesuhz kaw rawz plaetz keuh nahz reu oiz rak. Meuz phangz an diz, ihz keu ponz klamz truz ihz yam seu plaakz. Ihz heungz baaiz, keuh nam caang truz cu thatz. Kawp ceun diz keuh raw lang kusz kaang, ya teuk loz tuhz tawz Yesuhz, plawiz cur ihz penz an yaetz boh kaai saatz. Yesuhz awlz reung dengz yum keuh ne daz ihz yam seu plaakz nahz, “Kuanz Ohz, Ohz a wa plawiz lawt reung dengz kawi mih.”

⁶ Sra mawz kyaamz teur ka keui keu dez boh a diz ne daz tuhz phawmz daehz, “Cih naehz Ihz an ni daz ceun ni a? Hnhz upz pleung Phraz Pen Caoh. Naeh Phraz Pen Caoh pan plawiz lawt bawnz reung dengz kawi.”

⁸ Yesuhz mas keuh thaang ceun diz rae maanyz keuh nahz, “Cih naehz tuhz

⁹ phawmz pehz thaang ceun diz a? Mony reu ma an nae lao yoh tawz ihz yam seu plaakz? ‘A wa plawiz lawt reung dengz kawi mih,’ ne yoh haz? ‘Ceng leh ti yaetz

¹⁰ mih nuar lan raez,’ ne yoh haz? Aez pehz mas Kuanz Kingz Ihz maang a na tuhz prih keu teh plawiz lawt bawnz reung dengz

kawi,” rae Hnhz lao ihz yam seu plaakz
¹¹ nahz, “Rawi raez, leh ti yaetz mih, weng
 kaang daehz.”

¹² Ihz an diz kaw rawi luat, leh ti yaetz
 daehz weng aacz ngaai ihz tang heungz.
 Ihz keui sangz klawhz ihz rae lupz phrawz
 Phraz Pen Caoh daz, “Euz, ehz nam ti awlz
 ceun ni seu pawk ez.”

Yesuhz raak leh Lewi

(*Matthe 9:9-13, Lukas 5:27-32*)

¹³ Waaiz an diz Yesuhz lan waar nawngz
 Kalile thaengz seu laehz, ihz keui truz cu
 Hnhz, Hnhz kaw sawnz aez keuh nahz.

¹⁴ Hnhz kaw lan awlz Lewi kuanz Alphaeus,
 keu dez boh siungz seutz khawn rae
 Yesuhz daz hnhz nahz, “Lan tawiz Ohz
 raez.” Lewi kaw ceng lan tawiz Hnhz.

¹⁵ Meuz Yesuhz suamz seum suamz teuk
 borz tuhز kaang Lewi ne ihz seutz khawn
 boh ihz maang reung dengz kawi keui truz
 suamz kawmz Hnhz boh teu paez Hnhz.
 Kawp daz a diz maang ihz heungz baaiz

¹⁶ an lan tawiz Hnhz. Meuz sra mawz kyaamz
 teur ka an naeh tuhز Pharise keui awlz
 Hnhz suamz kawmz ihz seutz khawn boh
 ihz raai keui rae maanyz teu paez Hnhz
 daz, “Cih naehz Hnhz suamz kawmz ihz
 seutz khawn boh ihz raai keui a?”

¹⁷ Meuz Yesuhz ngarz ne daz, “Ihz moh rak
 keui nam lo tahz seu neumz, ihz penz keui
 pan lo a. Ohz truz ta raak leh ihz keu sangz
 keui nam anz, keuz daz naeh ta ihz maang
 reung dengz kawi keui.”

Kaerz seum suamz

(*Matthe 9:14-17, Lukas 5:33-39*)

¹⁸ Meuz teu paez Yohn boh Pharise keui
 kaerz seum suamz ne, ihz teur ka truz
 maanyz Yesuhz daz, “Teu paez Yohn boh
 Pharise keui kaerz seum suamz, cih naehz
 teu paez Mih keui nam kaerz a?”

¹⁹ Yesuhz kaw daz, “Meuz tahz seu naaoz
 yeung naeh kawmz boh khaekz daehz tuhز
 pawiz kopz ku ne anz keuh kaerz seum
 suamz? Nam kaerz keuz. Meuz tahz seu
 naaoz naeh tawiz keuh ne keuh nam caang
²⁰ kaerz seum suamz. Keuz daz kraao leh
 tahz seu naaoz praasz lan keuh ne ngaz
 naeh truz boh, meuz diz keuh ngaz kaerz
 seum suamz.”

²¹ “Yaeh nam leh banz teun mehز teuk
 baangz kreung trimz. Beuk cih ceun diz
 banz teun mehز teuk rut kreung trimz rae
²² tuhز baaiz waas. Ceun khuz an diz, yaeh
 nam leh omz seu pit teun mehز sapz tuhز
 seu kiz hurz trimz. Beuk cih ceun diz, omz
 seu pit teun mehز ne ngaz teuk plakz seu
 kiz hurz trimz, omz seu pit kaw teuk ukz,
 seu kiz hurz kaw ngaz luh. Omz seu pit
 teun mehز kaw sapz tuhز seu kiz teun
 mehز leun.”

Seu ngihz sinz

(*Matthe 12:1-8, Lukas 6:1-5*)

²³ Kaai seu ngihz sinz ne, Yesuhz keuh datz
 lan maar kaaiz kyung, teu paez Hnhz keui
 seur keut suamz seum kawr kaaiz kyung.

- ²⁴ Pharise keui daz Hnhz nahz, “Keuh nam rak seum cih ceun ni kaai seu ngihz ehz kaerz.”
- ²⁵ Hnhz kaw daz keuh nahz, “Pehz nam ti bawnz rawz lawng an ni seu pawk haz? Meuz kaap ceu beunz Abiathar ne, Khunz Dawit boh boh raen hnhz keui coh baaiz, ²⁶ nam caang cih seu naez. Hnhz kut tuhز kaang Phraz Pen Caoh, leh suamz seum suamz an ceu beunz keui pan suamz bawnz a, samz aez tang boh raen daehz keui nahz.”
- ²⁷ Yesuhz kaw daz keuh nahz, “Seu ngihz sinz ne naeh ta cih aez ihz rak, ihz nam anz ²⁸ ta cih aez seu ngihz sinz rak. Kawp ceun diz, Kuanz Kingz Ihz naeh Tahz seu ngihz sinz.”

Ihz tihz wiatz seu plaakz

(Matthe 12:9-14, Lukas 6:6-11)

- 3** Yesuhz mial kut tuhز crawl rawz traz thaengz seu laehz, a diz maang ihz ² hawkz tihz wiatz seu plaakz. Meuz diz maen kaai seu ngihz ihz kam sinz, ihz keui khahz reung dengz kawi kaai Hnhz, keuh pao yawt. Beuk Hnhz cih aez ihz an diz bilz kaw, keuh ngaz maap Hnhz cih ³ kaanz kaai seu ngihz sinz. Yesuhz daz ihz tihz wiatz ne nahz, “Truz ceng aacz ngaai ⁴ ihz raez.” Yesuhz peur wiang yawt ihz an sunz maap Daehz keu diz rae maanyz keuh nahz, “Kaai seu ngihz sinz ne sinz traz sawnz aez cih an rak haz, an raai haz? Sawnz aez khyawt ihz haz, piamz ihz haz?” Keuiz daz keuh moh pras pras.
- ⁵ Yesuhz yawt keuh rae sunz ca, phawmz kyehz baaiz kawp keuh tiu. Hnhz kaw daz ihz tihz wiatz ne nahz, “Peuk caatz tihz

- mih raez”. Ihz an diz kaw peuk caatz tihz daehz, tihz hnhz kaw a wa rak mial.
- ⁶ Pharise keui lae lan thaz crawl rawz traz, teur lao luat tang ihz Khunz Herot keui, keuh teur daz daehz nahz, ngaz piamz thengz Yesuhz ceun nae.

Wungz ihz

- ⁷ Yesuhz boh teu paez Hnhz keui lan nawngz Kalile, wungz ihz kaw lan tawiz
- ⁸ Hnhz. Ihz keu diz naeh ihz prih Kalile, ihz prih Yio, ihz weng Yerusalem, ihz prih Idume boh ihz thaz reu lae omz Yordan, tae leh a diz phraez lan weng Taia boh weng Sidon. Keuh ngarz reu oiz Yesuhz ⁹ rae truz cu Hnhz. Hnhz seumz teu paez keui leh mok aez Daehz nahz ceun luang seu lamz, yak aez ihz keui caang prawk ¹⁰ cu Daehz. Meuz phangz an diz, Hnhz a wa seuk neum aez ihz heungz baaiz, ihz penz keu diz kaw prawk kut cu teu Hnhz, sunz ¹¹ aez daehz bilz. Meuz ihz phiz ruakz kut keui awlz Yesuhz ne, keuh truz seuk deumz aacz ngaai Hnhz, raak daz, “Tahz ehz, Mih naeh kuanz Phraz Pen Caoh.”
- ¹² Yesuhz seumz mok mawn mawn keuh nahz, “Yak lao plaehz ihz nahz, Ohz naeh yaeh.”

Yesuhz ras teu maan seu kawlz aarz

(Matthe 10:1-4, Lukas 6:12-16)

- ¹³ Waaiz an diz, Yesuhz raw kaai rang, raak leh ihz an Hnhz dawhz keui pan, keuh kaw ¹⁴ lan cu Hnhz. Hnhz khaanz ihz seu kawlz aarz, peuk mus keuh teu maan, aez keuh ¹⁵ naeh kawmz Daehz, aez keuh rawz traz boh aez keuh nahz a na wah thengz phiz.

¹⁶ Teu paez seu kawlz aarz samz Simon
¹⁷ an Yesuhz peuk mus Petros, Yakop, Yohn
 an naeh kuanz Sebede an Hnhz peuk
 mus kaar Boanerkes an daz kuanz teuk
¹⁸ keurz. Andre, Philip, Bartholome, Matthe,
 Thomas, Yakop an naeh kuanz Alphaeus,
¹⁹ Thadae, Simon ihz plaakz prih omz Yio boh
 Yudas Iskariot an an ngaz saz kokz Hnhz.

**Ihz mawz kyaamz keui maap
 Yesuhz maang phiz Beelsebul**

(Matthe 12:22-32, Lukas 11:14-23, 12:10)

²⁰ Waaiz an diz, Yesuhz weng cu lang
 kaang. Ihz mial truz thaengz heungz
 baaiz, Hnhz boh teu paez Hnhz keui nam
²¹ caang suamz seum suamz. Meuz ihz kaang
 Yesuhz ngarz ihz teur ka daz, Hnhz a wa
 reu waet, keuh ngaz tawiz leh Hnhz.
²² Sra mawz kyaamz an cur truz thaz weng
 Yerusalem keui kaw daz, “Hnhz maang
 khunz phiz Beelsebul. Hnhz ceuk naeng
 khunz phiz an diz rae wah thengz phiz.”
²³ Kawp ceun diz, Yesuhz raak leh keuh truz
 cu Daehz, daz plaekz keuh nahz mony pung
 taek, “Satan ngaz cih seu naez wah thengz
²⁴ Satan? Parih an nae nam daz, beuk ihz prih
 teur deuz teur kawi daehz, ngaz cih seu
²⁵ naez penz prih? Beuk ihz kaang kawmz
 teur teuk praasz, teur kawi daehz kaw nam
²⁶ penz kaang. Beuk prih Satan teur deuz
 teur teuk praasz, teur kawi daehz kaw nam
 khreumz, ngaz phraeoz ti dutz.
²⁷ Beuk nam mat mok teuk aacz ihz keum
 rang mawh ne, nam caang kut tuhaz kaang
 hnhz, nam rimz leh bawnz kreung kaang
 hnhz. Mat mok teuk aacz caang kai rimz
 leh.
²⁸ Phraz Pen Caoh plawiz aez bawnz reung
 dengz kawi an cih leuz boh an upz leuz.

²⁹ Keuiz daz, ihz an upz leuz Khuanz Seu
 Ngamz samz Phraz Pen Caoh nam plawiz
 lawt aez seu pawk, kawp daz reung dengz
 kawi an diz naeh kawmz hnhz cen cen”.
³⁰ Yesuhz daz keuh nahz ceun diz, kawp keuh
 daz, “Hnhz maang phiz.”

Mah Yesuhz boh seum bohz Yesuhz

(Matthe 12:46-50, Lukas 8:19-21)

³¹ Waaiz an diz, mah Yesuhz boh seum bohz
 Yesuhz keui phraeoz truz, ceng thaz nawk
³² kaang, cao ihz raak leh Hnhz. Ihz heungz
 baaiz keu dez wit wit Hnhz, ihz teur ka kaw
 daz, “Mah Mih boh seum bohz Mih khahz
 boh Mih.”
³³ Yesuhz kaw mial daz, “Naeh yaeh, mah
³⁴ Ohz boh seum bohz Ohz a?” Yawt ihz keu
 dez wit wit Daehz keui daz, “Ihz keu ni
³⁵ naeh mah Ohz boh seum bohz Ohz. Ihz an
 cih tawiz reung dawhz Phraz Pen Caoh ne
 naeh mah Ohz boh seum bohz Ohz.”

Mony pung taek lawng pakz seu maalz

(Matthe 13:1-9, Lukas 8:4-8)

4 Yesuhz mial sawnz aez keuh nahz
 thaengz seu laehz a waar nawngz,
 ihz keui truz cu Hnhz heungz baaiz. Hnhz
 bawnz kut moh tuhaz ceun luang, aez ceun
 luang ne yaan waar nawngz teur nyaenz,
² wungz ihz keui samz naeh lang pukz. Meuz
 diz, Yesuhz lao plaekz keuh nahz mony pung
 taek daz,
³ “Teuk ngarz raez! Maang ihz hawkz lan
⁴ pakz seu maalz. Meuz hnhz pakz ne, cakz
 ceu teur ka keui klaez kaai reung dengz,
⁵ simz keui truz seutz suamz. Cakz ceu teur
 ka samz klaez kaai reu aangz heungz, keu
 tehz lany, liang lae truz luat, kawp daz

⁶ keuh tehz ne nam truh. Beuk seu ngihz a wa kawcz, teungz ne wiatz hawngz, kawp
⁷ daz rias nam truh. Cakz ceu teur ka samz klaez peur lah ruk seur keutz, meuz seur keutz keui mawh raw truz, riat teungz
⁸ keuh rae nam caang plaehz. Cakz ceu teur ka an klaez kaai keuh tehz rak samz, liang lae truz, mawh truz, penz teungz truz, samz plaehz truz waiz kawlz pun, tualz kawlz pun, peur ya pun an kaai hnhz peuk seumz.”
⁹ Yesuhz daz, “Ihz maang keuh tiakz keui, aez hnhz ngarz.”

**Kawp naehz Yesuhz
 bawnz lao mony pung taek?**

(Matthe 13:10-17, Lukas 8:9-10)

¹⁰ Meuz Yesuhz naeh taw daehz ne, teu paez Hnhz seu kawlz aarz boh ihz lan tawiz Hnhz keui maanyz ti loz mony pung taek.
¹¹ Yesuhz daz keuh nahz, “Phraz Pen Caoh a wa aez pehz mas lawng an truh an trawng prih Daehz. Ta ihz nam yum Ohz keui samz, Ohz bawnz leh mony pung taek sawnz aez
¹² keuh nahz. Kawp ceun diz,
 ‘Keuh yawt boh kaw nam awlz,
 teuk ngarz boh kaw nam loz phawmz.
 Beuk nam naeh ceun diz,

keuh ngaz seuk weur cu Phraz
 Pen Caoh rae,
 Hnhz kaw ngaz plawiz aez reung dengz kaw keuh.”

Ti loz mony pung taek

(Matthe 13:18-23, Lukas 8:11-15)

¹³ Yesuhz daz thaengz, “Beuk pehz nam loz phawmz mony pung taek an ni, ngaz cih seu naez loz phawmz mony pung taek tang
¹⁴ meoz? Ihz pakz seu maalz ne naeh ihz rawz plaehz ihz nahz mony reu ma Phraz.
¹⁵ Cakz ceu an klaez kaai reung dengz ne daz, ihz an a wa ngarz mony reu ma Phraz
¹⁶ ne Satan truz leh thengz luat. Cakz ceu an klaez kaai keuh tehz reu aangz heungz ne daz ihz an a wa ngarz mony reu ma Phraz ne seuz phawmz saanyz rap luat
¹⁷ boh kaw rias nam kut truh rae, moh taw teur co pan, kawp mony reu ma Phraz, meuz keuh talz reung dengz peur teuk boh reung dengz ihz pae suamz ne keuh nam
¹⁸ yum leui. Cakz ceu an klaez ruk seur keutz samz naeh ceun ihz ngarz mony reu ma
¹⁹ Phraz, keuz daz kawcz phawmz ta daehz, phawmz takz ron khamz ciz cim, phawmz takz tang ceu tang meoz keui kut tuh phawmz keuh rae riat mony reu ma Phraz

²⁰rae nam plaehz. Cakz ceu an klaez kaai keu tehز rak samz naeh ceun ihz an a wa ngarz mony reu ma Phraz rae seuz phawmz saanyz rap luat, keuh plaehz waiz kawlz pun, tualz kawlz pun, peur ya pun.”

Piat dupz ngal ngawiz

(Lukas 8:16-18)

²¹ Yesuhz siupz lao thaengz, “Yaeh nam leh piat dupz ngal ngawiz, nam anz kaw nam mok tuhز keutz kuz. Ihz mok kaai ti tam ngal ngawiz ne leun, aez ihz paw ²²awlز lan an thaangz. Nam maang phrihز phrahz naehz an seun tapz bawnz, ngaz bawnz awlz hacz aamz. Phrihز phrahz an unز keui kaw ihz ngaz mas, ihz ngaz awlz. ²³Ihز maang keu tiakz seum teuk ngarz keui, aez hnhz ngarz.”

²⁴ Yesuhz lao keuh thaengz, “Teuk ngarz rak rak, an pehز ngarz. Pehز tuang aez ihz nahz seu naeh kaw pehز ngaz bawnz seu diz. Ngaz aez pehز nahz leuz lak an diz. ²⁵Ihز an teuk ngarz traz Ohz sawnz ne Ohz ngaz aez keuh loz phawmz leuz. Keuiz daz ihz an nam teuk ngarz Ohz ne, Ohz ngaz leh thengz tang an keuh loz phawmz teur nyaenz.”

Mony pung taek lawng cakz ceu prae truz

²⁶ Yesuhz siupz lao thaengz, “Prih Phraz Pen Caoh naeh ceun ihz pakz seu maalز tuhز keu tehز ne. Meuz hnhz yaetz yaetz ²⁷rawi rawi boh seuk ngih teuk bimz, cakz ceu an diz kaw liang lae truz, mawh truz. ²⁸Hnhz nam mas teungz naeh ceun nae. Keu tehز ne cih aez teungz mawh, plaehz truz

daehz ne. Seun teungz cakz ceu ne liang penz teungz, waaiz an diz penz seum kawr, waaiz an diz penz cakz kuhz neuk tuhز ²⁹seum kawr. Beuk phraeoz kraao hnhz sinz, ihz kaw leh keun caan woc leh boh.”

Mony pung taek cakz Mustart

(Matthe 13:31-32, Lukas 13:18-19)

³⁰ Yesuhz siupz lao thaengz, “Neuz lak diz, ngaz leh mony pung taek naehz lao plaehz prih Phraz Pen Caoh a? Ngaz leh naehz ³¹neungz plaehz prih Phraz Pen Caoh a? Naeh ceun cakz mustart, kyehz lak cakz tang ³²meoz. Keuiz daz, beuk a wa peuk seumz lae truz penz teungz, teungz mawh lak teungz seu tuhز seu lahz, kaakz kaw mawh baaiz, simz ploiz keui truz cih haanz tawz eupz hnhz.”

³³ Yesuhz leh mony pung taek paw keunyz sawnz aez keuh nahz, seu keuh loz ³⁴phawmz bawnz. Hnhz sawnz aez peuk naeh kaw, cao mony pung taek klawhز laehz. Meuz Hnhz naeh kawmz teu paez Daehz keui pan, Hnhz krai plaehz keuh nahz hacz aamz.

Yesuhz cih aez kurz longz deukz

(Matthe 8:23-27, Lukas 8:22-25)

³⁵ Meuz teuk borz ne Yesuhz daz teu paez Daehz keui nahz, “Han! Ehز lo lan thaz ³⁶tui omz nawngz lah.” Teu paez keui kaw praasz lae thaz wungz ihz, cur cu Yesuhz tuhز ceun luang, tumz lo lan tawiz Hnhz. ³⁷Ceun luang ihz kaw lan tawiz. Meuz ceun diz penz truz cung longz kurz longz, seuk mar omz thanz paw lukz laakz sapz tuhز

³⁸ ceun luang, omz paw ngaz neuk. Yesuhz samz yaetz reuk ngeut boh kaai tangz thaz titz ceun luang ne, teu paez keui lan peun rawi Hnhz daz, “Tahz Sra! Nam yawt ehz leui haz? Ehz ngaz leucz omz.”

³⁹ Hnhz kaw ceng lao kurz longz boh omz nahz, “Moh pras pras.” Kurz kaw deukz ⁴⁰ lan, rim keu diz kaw plaangz lan. Yesuhz maanyz keuh, “Cih naehz lah pehz doz baaiz a? Cih naehz pehz maat maang reung dengz yum a?”

⁴¹ Keuh kaw sangz baaiz, teur daz daehz nahz, “Hnhz an ni naeh yaeh ez? Kurz boh seuk mar omz kaw teuk ngarz Hnhz.”

Yesuhz wah phiz ruakz lae kaai ihz hawkz

(Matthe 8:28-34, Lukas 8:26-39)

5 Waaiz an diz, Yesuhz boh teu paez keui phraeoz eungz Kerasin, thaz tui ² omz nawngz Kalile. Meuz Yesuhz lae thaz ceun luang ne maang ihz phiz kut hawkz, lae truz thaz ruk peun lu ne truz saanyz ³ Hnhz. Ihz an diz moh tuh z ruk peun lu, yaeh nam pae hnhz, leh nuarz hirz mat ⁴ mok kaw nam bawnz. Leh nuarz hirz kai mat mok tihz cawng hnhz heungz laehz baaiz, keuz daz hnhz tiut teuk teutz tang nuarz hirz. Yaeh nam pae mat bawnz hnhz. ⁵ Hnhz raak tuh z ruk peun lu boh kaai rang klawhz seu ngihz klawhz borz, hnhz leh reu aangz pacz saetz toz daehz.

⁶ Meuz hnhz awlz Yesuhz thaz meuz teun ⁷ yaan ne wang lan cu waiz Hnhz, raak keurz daz, “Yesuhz, Kuanz Phraz Pen Caoh an trawng dutz aez, sunz cih ohz ceun nae? Ohz teung kaa Phraz Pen Caoh rae maanyz Tahz ehz, yak cih aez ohz peur

⁸ teuk,” Ihz an diz daz ceun diz ne kawp Yesuhz a wa wah thengz phiz thaz hnhz daz, “Lae lan thaz hnhz raez.”

⁹ Yesuhz maanyz hnhz, “Mus mih daz naehz?”

Ihz an diz kaw daz, “Mus Ohz daz Phiz Wungz, kawp daz ehz naeh heungz ¹⁰ baaiz.” Phiz keui maanyz Hnhz mawh mawh heungz heungz, yak aez wah plaez daehz thaz prih an diz.

¹¹ A diz maang lek wungz mawh suamz boh ¹² kaai rang ne phiz keui maanyz Yesuhz, “Aez ehz bawnz kut tuh z wungz lek keu ¹³ diz.” Hnhz kaw aez keuh kut. Phiz keui kaw lae thaz ihz an diz, kut tuh z wungz lek, lek keui teuk basz cur tawiz phraakz rae leucz yam tuh z omz nawngz. Lek keui raenz naeh seu aarz rengz.

¹⁴ Ihz khaenz lek keui wang lan lao ihz tuh z weng boh tawiz pruh. Ihz keui kaw teur aacz daehz rip truz yawt lawng an ¹⁵ taamz naeh peun. Meuz keuh phraeoz tawz Yesuhz ne keuh awlz ihz an phiz kut ne keu dez boh a diz, kap boh kreung, awlz tang phawmz hnhz a wa rak mial rae keuh ¹⁶ kaw doz. Ihz an awlz ihz phiz kut boh lek keu diz, mial lao plaez ihz an truz thaz puatz keui nahz.

¹⁷ Meuz ceun diz, keuh maanyz Yesuhz lae lan thaz eungz daehz.

¹⁸ Meuz Yesuhz kut tuh z ceun luang, ihz an phiz a wa lae kaai hnhz ne maanyz lan tawiz Hnhz.

¹⁹ Keuz daz, Yesuhz daz, “Mih yak truz tawiz Ohz, weng cu lang kaang pehz lao plaez kuanz mai pehz nahz, lawng an Phraz Cen Cen teur yawng mih, cih kez cuz tawz mih thanz teur nae ne.”

²⁰ Ihz an diz kaw weng krai plaez ihz nahz lawng an Phraz Cen Cen cih kez cuz kaai daehz tawz prih Dekapolis. Ihz an bawnz ngarz keui kaw teur aacz daehz sangz baaiz.

**Kuanz Yairus boh keun
nyah thawkz naamz**

(Matthe 9:18-26, Lukas 8:40-56)

²¹ Meuz Yesuhz mial lo lan thaz tui omz, meuz Hnhz yeung naeh waar omz ne, ihz heungz baaiz teur aacz daehz truz cu
²²Hnhz. Meuz diz luat, maang ihz mawh crawp hawkz, mus hnhz daz Yairus ne truz
²³seuk deumz aacz ngaai Hnhz rae maanyz daz, “Kuanz keun nyah ohz ngaz yam. Truz rae leh tihz Mih taangz kaai hnhz ne hnhz ngaz moh rak, ngaz nam yam.”
²⁴ Yesuhz kaw lan tawiz Yairus, wungz ihz keui teur aacz daehz prawk teu Hnhz.
²⁵ Meuz ceun diz, maang keun nyah hawkz, naamz thawkz a wa bawnz seu kawlz aarz
²⁶wit. Hnhz a wa khahz tahz seuk neumz heungz baaiz, ron khamz seu hnhz maang keui a wa hacz kaw nam kian baaiz yeung
²⁷na. Hnhz ngarz reu oiz Yesuhz, hnhz lan tawiz puatz Hnhz rae teu kreung Hnhz.
²⁸Hnhz daz tuh phawmz daehz, “Beuk ohz bawnz teu kreung Hnhz kaw, an ohz penz ne ngaz bilz.”
²⁹ Meuz ceun diz luat naamz hnhz kaw eutz.
³⁰Hnhz mas toz daehz a wa bilz. Yesuhz mas taanz khoz lae thaz toz Daehz ne waaiz cu yawt ihz maanyz daz, “Yaeh teu kreung Ohz lah?”
³¹ Teu paez Hnhz keui kaw daz, “Ihz heungz thanz teur ni teur aacz daehz prawk teu

boh Mih ne caang daz maanyz, ‘Yaeh teu Ohz lah?’”
³² Yesuhz yeung waaiz yawt takz dahz takz kaaiz kawp sunz mas ihz an teu kreung
³³Daehz. Keun nyah an diz kaw doz teur ceus kawp daz hnhz mas reung naeh kaai daehz, truz seuk deumz aacz ngaai Yesuhz. Hnhz lao plaez Yesuhz nahz lawng
³⁴an daehz cih hacz aamz. Yesuhz kaw daz, “Kuanz, kawp mih yum rae a wa bilz. Lan nimz nimz naz. An mih penz ne a wa bilz.”
³⁵ Meuz daz boh ceun diz ne, maang ihz truz thaz kaang Yairus, truz lao daz Hnhz nahz, “Kuanz keun nyah mih a wa yam, cih naehz lah yeung tawiz sukz boh Tahz Sra a?”
³⁶ Yesuhz kaw ngarz tang Daehz rae daz
³⁷Yairus nahz, “Yak doz, lo yum pan.” Waaiz an diz, neuz lak Petros, Yakop boh seum boh hnhz Yohn pan Yesuhz nam aez yaeh
³⁸lan tawiz Daehz. Meuz keuh phraeoz a kaang ihz mawh crawp ne keuh awlz ihz
³⁹keui ronyz, raak yaam boh a diz. Yesuhz kut tuhz kaang keuh ne maanyz keuh, “Pehz yaam cih naehz? Kuanz ihz ne nam yam keuz, yaetz reuk ngeut pan.”
⁴⁰ Keuh kaw ngot keulz Hnhz. Yesuhz aez keuh lae thaz nawk rae, mah paz kuanz ihz tang teu paez Hnhz keui kut cu tuhz
⁴¹lukz hnhz ne Hnhz tawnz tang tihz hnhz daz, “Talitha kum,” an loz daz, “Kuanz, Ohz daz mih nahz, rawi raez.”
⁴² Meuz diz luat hnhz kaw rawi nuar. A saak kuanz ihz an diz naeh seu kawlz aarz khopz. Ihz keui teur aacz daehz sangz
⁴³baaiz. Yesuhz seumz mok mawn mawn tawz keuh, yak aez keuh lao ihz nahz lawng an ni. Waaiz an diz, Yesuhz cao keuh leh aez seum suamz aez kuanz ihz suamz.

Ihz weng Nasaret nam saanyz rap Yesuhz*(Matthe 13:53-58, Lukas 4:16-30)*

6 Yesuhz boh teu paez keui lae thaz a diz, phraeoz weng Nasaret an naeh ²weng Daehz. Kaai seu ngihz sinz ne, Yesuhz sawnz aez traz tuhز crawl. Ihz an bawnz ngarz keui teur aacz daehz sangz baaiz rae daz, “Ihz an ni bawnz truz traz keu ni thaz naez ez? Hnhz bawnz pi nya thaz naez, taanz khoz an plaез bawnz an ³laak laaiz ne truz thaz naez?” Keuh thaang laerz Hnhz daz, “Nam anz tahz lak seu maz haz? Nam anz kuanz Mari haz? Nam anz mai Yakop, Yosep, Yudas boh Simon keui haz? Seum bohз keun nyah Hnhz keui kaw moh rim ehz ne nam anz haz?”

⁴ Yesuhz kaw daz, “Ihz taangz phraz ne tuhз pruh tuhз weng daehz boh tawiz ceu kheuz kuanz mai daehz ne nam maang sre naehz, maang sre aarz diz pan.”

⁵ A diz Hnhz leh tihz Daehz taangz lang kol ihz aez moh rak pan, nam plaез thaengz ⁶an laak laaiz naehz leui. Hnhz sangz baaiz keuh nam yum.

Yesuhz cao peun lan teu paez daehz seu kawlz aarz*(Matthe 10:5-15, Lukas 9:1-6)*

Yesuhz khahz lan sawnz aez traz ihz keui nahz tawiz pruh rim Daehz naeh ne. ⁷Hnhz raak teu paez seu kawlz aarz truz cu Daehz, aez keuh nahz a na wah thengz phiz boh cao keuh lan keu aarz teur tawiz, ⁸seumz tang keuh nahz, neuz lak kawn teur leui, yak khaenz lan naehz tawiz reung

dengz. Yak khaenz seu kiz, seum suamz ⁹boh paekz sapz tuhз seum mat. Kap cawng khlapz pan, yak kap seu kaeng teur sawnz.

¹⁰“Neuz lak diz, pehz kut kaang ihz kaw thangz thonz taw pehz lae lan thaz weng

¹¹an diz. Tawiz ti ihz nam saanyz rap pehz, beuk keuh nam teuk ngarz pehz kaw meuz pehz lae thaz a diz ne pisz thengz yangz cawng pehz, aez keuh mas pehz cih khatz keuh. Ohz daz mawn pehz nahz, meuz seu ngihz tatz traz ne, weng an diz ngaz bawnz talz leuz lak weng Sodom boh weng Komorrah boh.”

¹² Keuh lae lan rawz aez ihz keui nahz traz ¹³caanz reung dengz kawi. Teu paez Hnhz keui wah thengz phiz heungz baaiz, keuh leh nam man thukz ihz nam moh rak keui heungz baaiz, aez keuh moh rak.

Yohn, tahz teuk srucz omz ne yam*(Matthe 14:1-12, Lukas 9:7-9)*

¹⁴ Khunz Herot Antipas ngarz lawng ihz hongz baaiz Yesuhz. Ihz teur ka daz, “Yohn tahz teuk srucz a wa meu rae imz kawp ceun diz rae hnhz caang cih an laak laaiz.”

¹⁵ Ihz teur ka thaang Hnhz naeh Eliyas. Teur ka kaw thaang Hnhz naeh ihz taangz phraz hawkz ceun ihz taangz phraz meuz neungz seu hawkz hawkz ne.

¹⁶ Meuz Khunz Herot ngarz reu oiz Hnhz ne daz, “Ihz an ni naeh Yohn, an ohz cao siukz tatz kokz hnhz a wa yam meu ¹⁷rae imz.” Kawp daz Khunz Herot leh mial Herotias, an naeh yah seum bohз daehz Philip ne, kawp keun nyah an diz toz Khunz

Herot luat caang cao siukz mat leh Yohn
¹⁸sapz thang. Kawp Yohn daz, “Khunz, nam
 rak seum leh mial yah seum boh z daehz.”

¹⁹Kawp ceun diz, Naang Herotias keu nakz
 tamz mok Yohn, sunz piamz hnhz kaw
²⁰nam caang. Khunz Herot doz Yohn, ro se,
 kan khraez hnhz, kawp hnhz naeh ihz seu
 ngamz tang ihz keu sangz. Meuz Khunz
 Herot teuk ngarz Yohn daz ne, sangz daz
 phawmz sukz kaw mok phawmz seuz seuz
 teuk ngarz mony hnhz.

²¹Waaiz an diz, phraezoz truz kraao sang
 trohz ta Herotias nahz. Khunz Herot raenz
 pawiz seu ngihz keut daehz, damz seum
 suamz teuk borz ne hnhz paangz muz
 maat, kingz siukz boh ihz mawh tuh z prih

²²Kalile keui. Meuz ceun diz ne, kuanz keun
 nyah Naang Herotias kut kaz tuh z paangz
 pawiz, trohz phawmz Khunz Herot boh
 boh z raen hnhz. Khunz kaw daz keun nyah
 ne nahz, “Mih dawhz naehz kaw maanyz
²³raez. Ohz aez boh mih nahz.” Samz aez
 thaengz tang keu ti, “Mih maanyz teur mih
 dawhz, thonz taw phraezoz prih seu khinz
 kaw ohz aez bawnz boh.”

²⁴Keun nyah kyehz kaw lae lan maanyz
 mah daehz, “Ohz ngaz bawnz maanyz leh
 naehz lah mah?”

Mah hnhz kaw daz, “Maanyz leh kingz
 Yohn tahz teuk sruz ne.”

²⁵Keun nyah kyehz an diz kaw rip kut lao
 khunz nahz, “Leh kingz Yohn tahz teuk
 sruz ne sapz tuh z pheunz an ni, truz aez
 ohz nahz seu ni luat.”

²⁶Khunz kaw kreuk phawmz baaiz, keuz
 daz kawp hnhz laanz lao aacz ngaai khaekz
 daehz, nam caang peur mial mony reu ma

²⁷daehz leui. Kawp ceun diz hnhz cao siukz
 hawkz lan tatz luat kingz Yohn an naeh
 tuh z thang ne. Siukz an diz kaw lan tatz

²⁸luat kingz Yohn, leh kingz Yohn sapz tuh z
 pheunz leh truz aez keun nyah kyehz ne
 nahz, hnhz kaw lan aez mah daehz nahz.

²⁹Meuz teu paez Yohn keui ngarz lawng an
 ni ne, truz leh lan pluz toz yam hnhz.

Yesuhz damz ihz hanz rengz

(*Matthe 14:13-21, Lukas
 9:10-17, Yohn 6:1-14*)

³⁰Teu maan keui mial truz cu teur cuhz
 daehz tawz Yesuhz, keuh lao plaez me
 rae an daehz cih boh an daehz rawz keui.

³¹Yesuhz kaw daz teu maan keui nahz, “Truz
 cu ti seun tapz ihz, preumz reu seu co.”

Kawp daz ihz heungz baaiz lan lan mial
 mial, teu maan keui thanz paw nam tan

³²suamz seum suamz. Kawp ceun diz keuh
 tumz ceun luang lan ti seun tapz.

³³Keuz daz ihz samz awlz keuh lan, keuh
 mas naeh Yesuhz boh teu paez Hnhz keui.

Ihz heungz baaiz lae truz klawhz weng
 klawhz pruh wang lan tawiz waar omz,

³⁴phraezoz aacz ti an keuh ngaz lan ne. Meuz
 Yesuhz lae truz cu lang pukz ne awlz keuh,

Hnhz teur yawng keuh kawp daz keuh naeh
 ceun soz nam maang ihz damz ne Hnhz

rawz aez keuh nahz heungz meoz baaiz.

³⁵ Meuz teuk borz ne, teu paez Hnhz keui truz cu Hnhz daz, “A niz ne naeh ti yaan
³⁶ihz, prih kaw a wa reu nyeum. Cao ihz keui khahz yal seum suamz tawiz pruh rim keu ni raez.”

³⁷ Yesuhz kaw daz, “Pehz aez keuh nahz seum suamz raez.”

Teu paez keui kaw daz, “Yal kaaiz mun ta ron aarz peur ya denarius ngaz aez keuh nahz seum suamz haz?”

³⁸ Yesuhz kaw daz keuh nahz, “Pehz dawmz yawt luz, maang kaaiz mun seu naeh?”

Keuh kaw lan yawt rae mial daz, “Maang kaaiz mun khantz boh kahz keu aarz.”

³⁹ Yesuhz kaw lao aez keuh keu dez penz

⁴⁰wungz kaai taak ngiar. Keuh kaw keu dez kaai taak ngiar teur wungz teur peur ya, teur wungz hanz kawlz, cih penz wungz

⁴¹penz wungz. Yesuhz kaw leh kaaiz mun khantz boh kahz keu aarz an diz, ngaw yawt lang plengz, taang kez cuz Phraz, pekz kaaiz mun aez teu paez keui teur phraez aez ihz nahz. Kahz keu aarz kaw Hnhz teur

⁴²phraez aez keuh nahz. Ihz keui kaw bawnz

⁴³suamz saakz klawhz ihz. Seutz leh an leuz keui bawnz seu kawlz aarz piat neuk neuk.

⁴⁴Keur meh suamz kaaiz mun ne naeh kraao hanz rengz.

Yesuhz nuar kaai omz

(Matthe 14:22-33, Yohn 6:15-21)

⁴⁵ Waaiz Yesuhz plawiz weng wungz ihz ne, cao teu paez Daehz keui kut tuh ceun

luang lo aacz, cu weng Betsaida, an naeh
⁴⁶thaz tui omz. Meuz Hnhz plawiz ihz keui

a wa weng hacz ne, Hnhz raw lan Daehz
⁴⁷ne kaai rang, ngaz suz tawngz. Meuz teuk

bimz ne, teu paez Hnhz naeh kaai ceun
 luang tuh ceun khinz omz nawngz. Yesuhz

⁴⁸taw daehz pan naeh lang pukz. Hnhz awlz teu paez Daehz keui wit ceun luang paw

reu, kawp kurz thoz truz nam maen plaakz. Meuz aacz prih thaangz kraao waiz na ri

ne, Hnhz nuar kaai omz, lan cu keuh, thanz
⁴⁹paw ngaz peun lan keuh. Keuiz daz meuz

keuh awlz Hnhz nuar kaai omz ne, thaang
⁵⁰Hnhz naeh phet rae raak keurz. Keuh kaw

doz baaiz kawp keuh awlz Yesuhz.

Hnhz kaw daz luat keuh nahz, “Mok phawmz eumz eumz! Naeh Ohz eu! Yak

⁵¹doz.” Meuz Hnhz kut tuh ceun luang keuh ne, kurz kaw deukz. Keuh kaw sangz mawn

⁵²mawn. Kawp daz kingz keu nuasz keuh tanz, keuh nam loz phawmz meuz Hnhz

damz kaaiz mun ne.

Yesuhz seuk neum ihz weng Kennesaret

(Matthe 14:34-36)

⁵³ Meuz keuh phraeoz eungz Kennesaret ne

⁵⁴peuk deukz mok ceun luang a diz. Meuz keuh lae truz thaz kaai ceun luang ne ihz

⁵⁵keui tang ngaai Yesuhz. Hnhz naeh a naez kaw ihz teur lao ihz rim daehz. Ihz keui

kaw leh ihz penz tang ti yaetz keuh, truz cu
⁵⁶Hnhz. Meuz Yesuhz lan tawiz weng tawiz

pruh, tawiz sraakz maar kaw, ihz keui mok

ihz suhz ihz rit tawiz teur laas rae maanyz teu caam caai kreung Hnhz. Ihz an teu keui kaw bawnz moh rak klawhz ihz.

Thungz caam ihz thao meuz neungz

(Matthe 15:1-9)

7 Waaiz an diz, Pharise boh ihz mawz kyaamz teur ka an truz thaz weng² Yerusalem keui, truz cu Yesuhz. Keuh awlz teu paez teur ka nam khez tihz suamz seum suamz.

³ Kawp daz Pharise boh ihz Yio tang heungz keui cih tawiz thungz caam ihz thao meuz neungz, beuk nam khez tihz⁴ kaw nam suamz seum suamz. Meuz weng truz thaz teur laas ne beuk nam khez kaw nam suamz. Neuz lak an diz klakz, klohz, sroz tawng boh kuz keui kaw khez, cih tawiz thaengz thungz caam tang meoz keui.

⁵ Kawp ceun diz, Pharise boh ihz mawz kyaamz daz Yesuhz nahz, “Teu paez Mih keui nam khez tihz kaw suamz. Cih naehz teu paez Mih keui nam cih tawiz thungz caam ihz thao meuz neungz a?”

⁶ Yesuhz kaw daz keuh nahz, “An ihz taangz phraz Isaiah rawz lawng pehz setz an seuk cih daehz naeh ihz rak ne a wa tawz baaiz. Hnhz taemz mok daz, Phraz Pen Caoh daz keuh nahz,

‘Ihz keu ni leh mony ro se Ohz,
keuiz daz kingz keu nuasz keuh
yaan Ohz baaiz.

⁷ Sawnz aez thungz caam ihz cih mok naeh ceun sinz Phraz. Keuh seuk cih daehz koz kwaai Ohz.’

⁸ Pehz plawiz thengz sinz Phraz Pen Caoh, samz cih tawiz thungz caam ihz thao meuz neungz.”

⁹ “Pehz sunz cih tawiz thungz caam ihz thao meuz neungz baaiz, thanz paw mawz

¹⁰ plawiz thengz sinz Phraz Pen Caoh. Moses lao mok daz, ‘Ro se mah paz daehz, ihz

¹¹ plawng mah paz ne, aez hnhz yam.’ Keuiz daz, pehz sawnz aez ihz nahz, ‘Maang phrihz phraz an lo aez mah paz ne, aez

¹² keuh daz naeh Korban’ an loz daz naeh Phrihz phraz Phraz Pen Caoh kaw ihz

¹³ an diz nam lo cih aez mah paz daehz nahz naehz leui. Aez daehz thanz paw

bawnz cih tawiz thungz caam ihz thao meuz neungz an siupz cur truz ne, pehz

thengz tang mony reu ma Phraz Pen Caoh. Pehz cih tawiz ceun diz heungz baaiz.”

Phrihz phraz an cih aez ihz woi

(Matthe 15:10-20)

¹⁴ Waaiz an diz, Yesuhz raak mial wungz ihz keui, daz keuh nahz, “Pehz teuk ngarz Ohz

¹⁵ raez, aez pehz loz phawmz. Seum suamz an naeh thaz nawk kut tuhzh ihz ne, nam

cih aez ihz woi. An lae truz thaz nao ihz¹⁶ pan cih aez ihz woi a. Ihz maang keu tiakz

keui, aez hnhz ngarz.”

¹⁷ Meuz Yesuhz praasz wungz ihz kut tuhzh kaang ne, teu paez keui maanyz ti loz mony

¹⁸ pung taek an diz. Hnhz kaw daz keuh nahz, “Teur diz kaw pehz nam loz haz? Seum

suamz klawhz meoz an truz thaz nawk kut¹⁹ tuhzh ihz ne nam cih aez ihz woi. Seum

suamz an naeh thaz nawk keui nam kut tuhzh kingz keu nuasz. Kut tuhzh klungz,

phraeoz tuhz reu ingz rae nam cih aez ihz woi keuiz.” Seum suamz keui seu ngamz hacz aamz aacz ngaai Phraz Pen Caoh.

²⁰ “An lae truz thaz nao ihz pan, cih aez ihz
²¹ woi a. Kawp daz an lae truz thaz nao ihz ne, naeh an wonz meukz, kawi kamesuhz, rah khangz ihz, piamz ihz,
²² dawhz kuanz yah ihz, lawphahz mawh, phawmz wot, kaoz suamz ihz, phawmz meukz, seu ke ihz, phyaakz sre ihz, seuk
²³ sam, nam saangz suamz ihz, an keu ni ne lae thaz nao ihz rae cih teuk woi ihz.”

Reung dengz yum keun nyah ihz prih Siria

(Matthe 15:21-28)

²⁴ Waaiz an diz, Yesuhz moh a diz lan thaz keun bongz tawz eungz a nae weng Taia. Hnhz nam sunz aez ihz mas Daehz naeh a
²⁵ diz kaw nam caang. Meuz diz luat, maang keun nyah hawkz, kuanz keun nyah kyehz hnhz an phiz kut ne ngarz reu oiz Yesuhz
²⁶ truz seuk deumz aacz ngaai Hnhz. Maanyz tang Hnhz nahz, aez wah thengz phiz tuhz kuanz keun nyah kyehz daehz. Keun nyah an diz naeh ihz an nam anz kheuz Yio, moh
²⁷ a eungz Phoenisia tuhz prih Siria. Yesuhz kaw daz hnhz nahz, “Ohz lo damz aacz kuanz Daehz saakz saakz. Nam rak seum leh kaaiz mun kuanz ihz seum plawngz aez sohz nahz.”

²⁸ Keun nyah an diz kaw daz, “Anz mawn laai, Tahz ehz. Keuiz daz sohz keui kaw caang seutz suamz boh kaaiz mun an nyawi, an kuanz ihz teuk beurz keui.”

²⁹ Yesuhz kaw daz hnhz nahz, “Kawp mony reu ma an ni, mih weng raez. Phiz ne a wa lae lan thaz kuanz keun nyah kyehz mih.”

³⁰ Keun nyah an diz kaw weng lan, awlz kuanz keun nyah kyehz daehz ne yaetz

reuk ngeut boh a diz, phiz kaw a wa lae thaz kuanz keun nyah kyehz ne.

Yesuhz cih aez ihz ahz keu tiakz lutz hawkz ne rak

³¹ Waaiz an diz, Yesuhz lae truz thaz weng Taia, datz truz tang weng Sidon, peun truz thaengz tang prih Dekapolis phraeoz
³² nawngz Kalile. Meuz diz, ihz keui leh ihz ahz keu tiakz lutz hawkz truz cu Hnhz, keuh maanyz aez Yesuhz leh tihz Daehz
³³ taangz lang kol hnhz. Yesuhz kaw leh hnhz lae thaz ihz keu diz, lan ti seun tapz. Leh reum haz tihz Daehz cukz sapz tuhz keu tiakz hnhz, teuk chuz tang omz nyaangz
³⁴ teu taakz hnhz. Beuk a wa kaw ngaw yawt lang plengz, seuk weu tang phawmz Daehz daz, “Ephphatha,” an loz daz, “Aez loz.”
³⁵ Meuz diz luat, keu tiakz hnhz a wa ngarz, taakz hnhz kaw a wa keu ceum, upz kaw
³⁶ a wa cakz. Waaiz an diz, Yesuhz seumz keuh yak aez lao ihz nahz lawng an ni. Hnhz yeung seumz, reu oiz baaiz yeung
³⁷ lae. Ihz keui kaw teur aacz daehz sangz baaiz thanz paw nam maang ti lao rae daz, “Hnhz a wa cih sang trohz klawhz meoz, aez ihz keu tiakz lutz keui ngarz, aez ihz ahz keui reu ma bawnz.”

Yesuhz damz ihz ponz rengz

(Matthe 15:32-39)

8 Meuz ceun diz ihz keui truz teur cuhz daehz tawz Yesuhz heungz baaiz samz nam maang seum suamz naehz leui, Hnhz raak leh teu paez Daehz keui rae
² daz keuh nahz, “Ohz teur yawng ihz keu ni. Keuh a wa naeh kawmz Ohz waiz seu ngihz, keuh nam maang seum suamz naehz

- ³ leui. Teur ka truz thaz ti yaan, beuk Ohz nam damz keuh nahz seum suamz naehz, plawiz weng kaw keuh te onz tawiz reung dengz.”
- ⁴ Teu paez Hnhz kaw daz, “Ngaz cih seu naez damz keuh saakz bawnz naeh tuh ruk ceun ni a?”
- ⁵ Yesuhz maanyz keuh, “Pehz maang kaaiz mun seu naeh?”
- Keuh kaw daz, “Naeh teu pulz.”
- ⁶ Yesuhz cao ihz keui keu dez kaai keu teh. Leh kaaiz mun teu pulz, taang kez cuz Phraz Pen Caoh, pekz kaaiz mun aez teu paez Daehz keui teur phraez aez ihz
- ⁷ keui nahz. Keuh kaw maang tang kahz kyehz teur nyaenz, Hnhz leh kahz taang kez cuz rae lao teu paez Daehz keui teur
- ⁸ phraez aez thaengz ihz keui nahz. Ihz keui kaw bawnz suamz saakz klawhz ihz. Seutz leh an leuz ne bawnz pulz yol neuk neuk.
- ⁹ Ihz suamz kaaiz mun ne raenz naeh seu ponz rengz. Yesuhz kaw plawiz ihz keu diz
- ¹⁰ weng, tang teu paez Daehz keui kut luat tuh ceun luang lan cu prih Dalmanutha.

Pharise keui cao cih plaez an laak laaiz

(Matthe 16:1-4)

- ¹¹ Pharise teur ka keui truz cu Yesuhz, upz thiangz Hnhz, sunz caam yawt Hnhz rae, cao cih plaez tang an laak laaiz kaang raaaz aez daehz mas Hnhz maang a na.
- ¹² Hnhz kaw seuk weu phawmz Daehz daz, “Ihz keu ni caang daz maanyz an laak laaiz ez? Ohz daz mawn ihz keu ni nahz, Ohz nam cih plaez keuh nahz an laak laaiz naehz.”

- ¹³ Hnhz praasz lae thaz keuh mial kut tuh ceun luang, lo lan thaz tui omz boh.

Ceu Pharise boh ceu khunz Herot

(Matthe 16:5-12)

- ¹⁴ Teu paez keui nam tang leh lan kaaiz mun, kaai ceun luang keuh ne maang taw
- ¹⁵ kaaiz mun hawkz pan. Hnhz seumz keuh nahz, “Mok seu tih! Pehz wiar thengz ceu Pharise boh ceu Khunz Herot.”
- ¹⁶ Teu paez keui kaw teur daz daehz nahz, “Kawp ehz nam leh truz kaaiz mun keuz”
- ¹⁷ Yesuhz kaw mas rae daz keuh nahz, “Pehz teur daz daehz nahz kawp nam maang kaaiz mun haz? Thonz taw seu ni kaw pehz maat loz phawmz lawh haz? Maat tuh lawh haz? Kingz keu nuasz
- ¹⁸ pehz yeung tanz boh haz? Maang ngaai kaw nam awlz, maang keu tiakz kaw nam ngarz. Pehz maat dangz toz lawh haz?
- ¹⁹ Meuz Ohz pekz kaaiz mun khanz, damz ihz hanz rengz ne seutz bawnz an leuz seu naeh piat?”
- Keuh kaw daz, “Seu kawlz aarz piat.”
- ²⁰ “Meuz Ohz pekz kaaiz mun teu pulz, damz ihz ponz rengz ne seutz bawnz an leuz seu naeh piat?” Keuh kaw daz, “Pulz piat.”
- ²¹ “Paw daz, taw phraez seu ni kaw pehz maat loz phawmz hoh?”

Yesuhz cih aez ihz ngaai lapz awlz

- ²² Meuz keuh phraez pruh Betsaida ne ihz keui leh truz ihz ngaai lapz hawkz, keuh
- ²³ maanyz Yesuhz aez teu hnhz. Yesuhz kaw

yawk leh tihz ihz ngaai lapz ne, aacz lae lan nawk pruh. Teuk chuz omz nyaangz sapz ngaai hnhz, leh tihz taangz lang kol hnhz maanyz daz, “Anz mih awlz?”

²⁴ Hnhz kaw ngaw yawt, “Ohz awlz ihz keui naeh ceun teungz Khaehz ne nuar boh.”

²⁵ Hnhz kaw leh tihz taangz lang kol ngaai hnhz thaengz rae cao yawt, ihz an diz kaw a wa awlz caem, deuiz meu rae puatz

²⁶ trimz. Yesuhz kaw cao hnhz weng kaang daehz, lao seumz hnhz yak kut tuhaz pruh.

Petros lao Yesuhz naeh Tahz Khris

(Matthe 16:13-20, Lukas 9:18-21)

²⁷ Yesuhz boh teu paez Hnhz keui lan cu pruh rim weng Kaesare Philippi. Meuz naeh tawiz reung dengz ne Hnhz maanyz teu paez Daehz nahz, “Lao plaeh yawt Ohz nahz luz, ihz keui daz Ohz naeh yaeh?”

²⁸ “Teur ka daz, Tahz ehz naeh Yohn, an aez teuk srucz omz. Teur ka kaw daz naeh Eliyas. Teur ka kaw daz naeh ihz taangz phraz hawkz.”

²⁹ Hnhz kaw maanyz keuh, “Pehz samz daz, Ohz naeh yaeh hoh?”

Petros kaw daz, “Tahz ehz naeh Tahz Khris.”

³⁰ Yesuhz kaw lao mok teu paez Daehz keui nahz, “Yak aez keuh lao Daehz naeh yaeh.”

Yesuhz lao teuk aacz lawng an Daehz ngaz yam

(Matthe 16:21-28, Lukas 9:22-27)

³¹ Yesuhz seun teungz lao teu paez Daehz keui nahz, “Kuanz Kingz Ihz ne ngaz talz suhz heungz, ngaz talz ihz thiangz thengz, ngaz bawnz yam kaai tihz ihz mawh, beunz

caangz boh ihz mawz kyaamz. Keuiz daz moh waiz seu ngihz, meu rae imz boh.”

³² Yesuhz lao plakz baaiz, Petros raak leh

³³ nae Hnhz. Keuiz daz Yesuhz waaiz yawt tang teu paez Daehz keui daz Petros nahz, “Tiunz raez, Satan, mih nam takz phawmz lawng Phraz, takz phawmz lawng ihz pan.”

³⁴ Yesuhz raak teu paez Daehz boh ihz keui, daz keuh nahz, “Ihz an sunz lan tawiz puatz Ohz ne bawnz thiangz thengz toz daehz, baekz lakz klawngz klaengz daehz,

³⁵ lan tawiz puatz Ohz. Ihz an sunz khyawt phawmz daehz ne ngaz luh sumz, ihz an luh sumz kawp Ohz boh reu oiz rak samz,

³⁶ ngaz khyawt mial toz daehz boh. Yaeh se nam daz, prih keu tehaz hacz aamz naeh khangz hnhz kaw, beuk khuanz hnhz luh sumz ne nam maang a keoz naehz?

³⁷ Nam maang naehz teur yal bawnz khuanz

³⁸ phawmz ihz. Ihz an keu sehaz kawp mony reu ma Ohz kaap ihz meukz raai seu ni ne, meuz Kuanz Kingz Ihz leh bunz Paz Phraz tang teu maan kaang raaaz an seu ngamz keui truz ne ngaz bawnz keu sehaz kawp ihz an diz.”

9 Yesuhz daz keuh nahz, “Ohz daz mawn pehz nahz, ihz an naeh a niz teur ka keui thonz taw keuh maat awlz prih Phraz Pen Caoh an tae kaai taanz khoz ne, keuh maat bawnz yam.”

Yesuhz plut raang

(Matthe 17:1-13, Lukas 9:28-36)

² Moh thaengz tualz seu ngihz, Yesuhz raak leh Petros, Yakop boh Yohn pan rae raw kaai rang an trawng, ti seun tapz ne. Raang Yesuhz ne plut aacz ngaai keuh, ³ kreung Hnhz kaw aasz keun ra thanz paw ihz seuk tuhaz kreung tuhaz prih keu tehaz

ne nam caang seuk tuh z aez keun ra deuz
⁴ ceun diz. Meuz diz, keuh keu waiz awlz
 Moses kaar Eliyas paw truz aacz ngaai
⁵ keuh rae upz taw Yesuhz. Meuz phangz an
 diz, Petros daz Yesuhz nahz, “Tahz eh z, a
 niz ne naeh ti rak seum moh. Eh z ngaz cih
 siungz keu waiz, ta Mih hawkz, ta Moses
⁶ hawkz, ta Eliyas hawkz.” Keuh keu waiz
 kaw doz baaiz. Petros kaw nam mas ngaz
 daz ceun nae rae daz nahz ceun diz.

⁷ Meuz ceun diz, peu eumz ne teuk eupz
 keuh, reus lae truz thaz peu eumz ne
 daz, “Hnhz an ni naeh Kuanz an Ohz yaw,
 teur aacz daehz teuk ngarz mony reu ma
⁸ Hnhz.” Meuz diz luat, keuh waaiz yawt wit
 wit thaz naez kaw neuz lak Yesuhz pan,
 nam awlz yaeh leui.

⁹ Meuz keuh cur truz thaz rang ne, Yesuhz
 seumz mok keuh nahz, “Yak lao ihz lawng
 an pehz awlz, thonz taw Kuanz Kingz Ihz
 maat meu rae imz thaz reung dengz yam.”

¹⁰ Keuh teuk ngarz boh mony Hnhz, samz
 teur daz daehz nahz, “Meu rae imz thaz
 reung dengz yam ne loz daz naehz ez?”

¹¹ Keuh kaw maanyz thaengz Yesuhz daz,
 “Kawp naehz, ihz mawz kyaamz keui daz
 Eliyas ne truz aacz a?”

¹² Yesuhz kaw daz, “Eliyas truz aacz rae a
 wa meu rae mok keunyz. Cih naehz taemz
 mok tuh z kyaamz lik daz, Kuanz Kingz Ihz
 samz ngaz talz reung dengz peur teuk boh
¹³ talz ihz thiangz thengz a?” Keuz daz Ohz
 daz pehz nahz, “Tuh z kyaamz lik taemz
 mok daz, Eliyas ne a wa phraeoz, ihz cih
 Hnhz teur keuh sunz.”

Yesuhz wah thengz phiz an kut tuh z kuanz ihz

(Matthe 17:14-20, Lukas 9:37-43)

¹⁴ Meuz keuh phraeoz truz mial ti teu
 paez an kiutz ne awlz wungz ihz wit
 wit keuh, teur thiangz tang ihz mawz
¹⁵ kyaamz keui. Meuz wungz ihz keui awlz
 Yesuhz ne sangz baaiz saanyz seuz upz
¹⁶ tak luat Hnhz. Yesuhz kaw maanyz teu
 paez Daehz, “Pehz teur thiangz tang keuh
 lawng naehz?”

¹⁷ Ihz hawkz an naeh tuh z wungz ihz ne
 daz, “Tahz Sra, ohz leh truz kuanz ohz an
 phiz kut cih aez hnhz nam caang upz ne,
¹⁸ truz cu Mih. Meuz phiz kut tuh z hnhz ne
 taz tuh z keu teh z, thaz mony hnhz kaw
 lae busz, teur kak raangz. Toz hnhz kaw
 kuangz. Ohz lao teu paez Mih keui aez
 keuh wah thengz phiz kaw keuh nam pae
 bawnz.”

¹⁹ Yesuhz kaw daz keuh nahz, “Euz, ihz
 an nam yum keui, Ohz ngaz bawnz moh
 kawmz pehz seu naeh? Ohz ngaz bawnz
 nyeun pehz seu naeh? Leh kuanz ihz truz
²⁰ cu Ohz raez.” Keuh kaw leh kuanz ihz lan
 cu Hnhz.

Meuz phiz an diz awlz Yesuhz ne cih
 aez kuanz ihz raw, taz tuh z keu teh z,
 kling lan kling mial, omz nyaangz kaw busz
²¹ lae thaz mony hnhz. Yesuhz maanyz paz
 kuanz ihz daz, “Penz ceun ni ne anz a wa
 ceu nawhz?”

Paz kuanz ihz kaw daz, “Thaz meuz hnhz
²² kyehz, Phiz ne sunz aez hnhz yam rae kai

leh teuk klaez tuhz omz boh tuhz ngal. Beuk Mih penz bawnz kaw teur yawng ehz, kawr ehz.”

²³ Yesuhz kaw daz hnhz nahz, “Cih naehz lah, Mih caang daz beuk Mih penz bawnz a? Beuk mih yum kaw penz bawnz klawhz meoz eu.”

²⁴ Paz kuanz ihz kaw daz luat tang reus usz, “Tahz, Ohz yum boh, kawr tang an ohz nam yum keui.”

²⁵ Meuz ceun diz, Yesuhz awlz ihz keui wang truz rae Hnhz wah thengz phiz ahz ne daz, “Phiz ahz keu tiakz lutz aez, Ohz lao mih, lae lan thaz kuanz ihz raez, thaengz seu laehz yak kut leui.”

²⁶ Phiz an diz kaw raak keurz cih aez kuanz ihz ne raw teur kuangz kaw lae lan. Ihz tang heungz keui thanz paw daz kuanz ihz ne a wa yam. Keuiz daz, Yesuhz tawnz tihz kuanz ihz yawk peun rawi, kuanz ihz kaw rawi ceng.

²⁷ Meuz weng phraeoz lang kaang ne, teu paez keui maanyz Hnhz, “Kawp naehz ehz nam pae wah thengz phiz an diz a?”

²⁸ Yesuhz kaw daz, “Neuz lak suz tawngz, laai tang meoz keui nam pae.”

**Yesuhz lao teuk aacz
lawng an Daehz ngaz yam**

(Matthe 17:22,23, Lukas 9:43-45)

³⁰ Yesuhz boh teu paez Hnhz keui lae lan thaz a diz, datz lan prih Kalile, nam sunz aez yaeh mas Daehz naeh a naez. Kawp Hnhz sawnz aez teu paez Daehz keui daz, “Kuanz Kingz Ihz ne ngaz talz ihz aapz thengz kaai tihz ihz, ihz kaw ngaz piamz

Hnhz. Keuiz daz, moh waiz seu ngihz meu rae imz boh.”

³² Sangz daz, keuh nam loz phawmz lawng an diz kaw keuh nam yaak maanyz meu rae Hnhz.

Yaeh mawh myaat lak ihz?

(Matthe 18:1-5, Lukas 9:46-48)

³³ Meuz keuh phraeoz weng lang kaang, weng Kapernaum ne Yesuhz maanyz keuh, “Meuz naeh tawiz reung dengz ne pehz teur daz daehz nahz lawng naehz?”

³⁴ Keuiz daz, keuh moh pras pras boh, kawp daz keuh teur daz daehz nahz, naeh yaeh

³⁵ mawh myaat lak ihz. Yesuhz kaw keu dez, raak leh teu paez seu kawlz aarz rae daz, “Ihz sunz penz peur aacz ihz ne, lo naeh thaz puatz ihz, lo naeh peur cao ihz hacz

³⁶ aamz.” Raak leh tang kuanz ihz hawkz aez moh teun khinz keuh, pumz tang kuanz ihz,

³⁷ daz keuh nahz, “Ihz an saanyz rap kuanz ihz kawp mus Ohz ne, saanyz rap Ohz. Ihz an saanyz Ohz samz, saanyz rap taw Ohz nam anz, saanyz rap pa tang Tahz an cao Ohz truz.”

Ihz nam khatz ehz naeh ihz ehz

(Lukas 9:49-50)

³⁸ Yohn daz Yesuhz nahz, “Tahz Sra, ehz awlz ihz hawkz leh mus Mih wah thengz phiz, ehz kan hnhz kawp daz hnhz nam lan tawiz ehz.”

³⁹ Yesuhz kaw daz, “Yak kan hnhz, waaiz ihz an leh mus Ohz plaiez an laak laaiz ne, nam paw ceu nawhz yaeh nam caang saehz

⁴⁰ Ohz leui. Ihz an nam cih khatz ehz ne naeh
⁴¹ plaakz ehz. Ohz daz mawn pehz nahz, ihz
 an leh mus Ohz aez pehz nahz omz seu
 klakz kawp daz pehz naeh ihz Ohz ne tiunz
 bawnz a suz.

A keoz an cih pleung

(Matthe 18:6-9, Lukas 17:1-2)

⁴² Ihz an cih pleung kuanz ihz an yum Ohz
 ne rak lak leh reu aangz mawh hawiz kokz
 hnhz, leh hnhz wiurz sapz tuhaz omz paang
⁴³ laai. Beuk tihz mih cih aez mih pleung kaw
⁴⁴ tatz thengz. Pheuz lak maang tihz keu aarz
 bawnz kut tuhaz ngal raai, racz nam yam,
 ngal nam ngat ne, maang tihz seu plaakz
 pan, bawnz kut ti phawmz imz cen cen ne
⁴⁵ baaiz rak lak an diz. Beuk cawng mih cih
⁴⁶ aez mih pleung kaw tatz thengz. Pheuz
 lak maang cawng keu aarz bawnz kut tuhaz
 ngal raai, racz nam yam, ngal nam ngat ne,
 maang cawng seu plaakz pan bawnz kut ti
 phawmz imz cen cen ne baaiz rak lak an
⁴⁷ diz. Beuk ngaai mih cih aez mih pleung kaw
 klawkz thengz. Maang ngaai seu plaakz
 pan bawnz kut tuhaz prih Phraz Pen Caoh
⁴⁸ ne rak lak maang ngaai keu aarz bawnz kut
 tuhaz ngal raai, racz nam yam, ngal nam
 ngat ne.
⁴⁹ Ihz hacz aamz bawnz talz leh ngal cih aez
 seu ngamz. Naeh ceun khuz an toz pukz
 caw klawhaz toz bawnz sapz suakz cih aez
 seu ngamz.

⁵⁰ Suakz rak baaiz. Keuiz daz beuk nam taap
 leui kaw, ngaz cih seu naez aez hnhz taap
 mial.

Pehz teur deuiz kaw aez maang suakz.
 Moh aez daehz teur maen.”

Sawnz lawng tahz yah teur thengz

(Matthe 19:1-12, Lukas 16:18)

10 Waaiz an diz, Yesuhz lae lan thaz
 weng Kapernaum phraeoz thaz
 tui omz Yordan, naeh orz prih Yio ne leun.
 Ihz keui mial truz cu Hnhz rae sawnz aez
 ihz nahz ceun Hnhz kai sawnz klawhaz pawk
 ne leun.

² Pharise teur ka sunz caam yawt Hnhz rae
 maanyz, “Tuhz traz ne anz daz ihz ehz
 caang thengz yah?”

³ Yesuhz mial maanyz keuh, “Moses seumz
 mok pehz nahz seu naez da?”

⁴ Keuh tawpz daz, “Moses seumz mok daz,
 keur meh bawnz taemz aez lik thengz rae
 thengz yah daehz.”

⁵ Yesuhz kaw daz, “Kawp pehz tiu, Moses

⁶ taemz mok ceun ni. Keuiz daz, thaz meuz
 seun teungz Phraz Pen Caoh phaan cih

⁷ ne cih keur meh boh keun nyah. Kawp
 ceun diz keur meh ne praasz mah paz,

⁸ moh kawmz keun nyah. Kaar kaar ni naeh
 hawkz kawmz. Kawp ceun diz kaar nam

⁹ anz keu aarz leui, naeh ihz hawkz pan. An
 Phraz Pen Caoh kopz ku ne, yak aez ihz leh
 teuk praasz.”

¹⁰ Meuz keuh a wa kut naeh tuhz kaang ne teu paez Hnhz keui maanyz Hnhz lawng
¹¹an ni. Yesuhz kaw daz, “Ihz thengz yah daehz, leh thaengz hawkz ne cih pleung
¹²kamesuhz kaai yah daehz. Keun nyah kaw naeh ceun diz, thengz tahz daehz, leh thaengz hawkz ne cih pleung tahz daehz.”

Yesuhz aez reung dengz rak kuanz ihz

(*Matthe 19:13-15, Lukas 18:15-17*)

¹³ Ihz teur ka leh kuanz ihz truz cu Yesuhz, cao Yesuhz mok tihz lang kol keuh, aez reung dengz rak kaai keuh. Keuz daz teu
¹⁴paez Hnhz keui nae keuh. Meuz Yesuhz awlz ne sunz ca, daz teu paez daehz keui nahz, “Aez kuanz ihz keui truz cu Ohz raez, yak kan keuh. Prah Phraz Pen Caoh
¹⁵ne naeh prah ceun keuh. Ohz daz mawn pehz nahz, beuk ihz an nam saanyz rap prah Phraz Pen Caoh ceun kuanz ihz kaw
¹⁶ngaz nam bawnz kut.” Yesuhz pumz leh tang kuanz ihz, mok tihz lang kol keuh, aez keuh nahz reung dengz rak.

Lawng ihz maang

(*Matthe 19:16-30, Lukas 18:18-30*)

¹⁷ Meuz Yesuhz lan tawiz reung dengz weng Yerusalem ne, maang ihz hawkz wang truz seuk deumz maanyz, “Tahz Sra Rak, ohz bawnz cih naehz aez ohz bawnz phawmz cen cen a?”
¹⁸ Yesuhz kaw daz hnhz nahz, “Kawp naehz, raak Ohz Tahz Sra Rak a? Neuz lak Phraz Pen Caoh taw Daehz pan nam
¹⁹maang yaeh rak. Mih mas boh sinz nam anz haz? Yak piamz ihz, yak kawi kamesuhz, yak rah, yak khaam saak se an nam anz, yak upz suamz ihz, ro se mah paz daehz.”

²⁰ Ihz an diz kaw daz, “Tahz Sra, sinz keu ni ohz a wa cih tawiz thaz meuz ohz kyezhz.”

²¹ Yesuhz kaw yawt hnhz, teur yawng hnhz rae daz, “Mih yeung lo cih thaengz boh seu meoz, lan saz phrihz phrahz mih hacz aamz aez ihz phaanz keui nahz. Beuk mih cih ceun diz ngaz bawnz phan ta tuhz kaang raaaz. Beuk a wa cih ceun diz, baekz lakz klawngz klaengz, truz tawiz puatz
²²Ohz.” Ihz an diz kaw ngaai peukz, phawmz kyezhz lae lan, kawp daz hnhz naeh ihz maang.

²³ Yesuhz kaw waaiz yawt tang teu paez Daehz keui daz, “Ihz maang ne kut kreuk baaiz tuhz prah Phraz Pen Caoh.”

²⁴ Meuz teu paez keui ngarz mony reu ma an diz ne, keuh meun lan. Yesuhz daz keuh nahz, “Kuanz Ohz keui aez, kut kreuk
²⁵baaiz prah Phraz Pen Caoh. Meu rang maang soz kut tuhz bawngz peun lac ne yoh lak ihz maang kut prah Phraz Pen Caoh eu.”

²⁶ Teu paez keui kaw baaiz meun lan thaengz boh, teur daz daehz nahz, “Beuk naeh ceun diz, yaeh ngaz bawnz reung dengz khyawt hoh?”

²⁷ Yesuhz kaw yiang yawt keuh daz, “An ni ihz cih nam penz bawnz kaw Phraz Pen Caoh cih penz bawnz boh. Phraz Pen Caoh cih penz bawnz klawhz meoz.”

²⁸ Meuz ceun diz, Petros daz Yesuhz nahz, “Ehz cunz hacz aamz, lan tawiz Tahz ehz.”

²⁹ Yesuhz kaw daz mawn keuh nahz, “Ihz an cunz thengz kaang, sraakz maar, kuanz mai, mah paz, kuanz yah, seu meoz meoz
³⁰kawp Ohz boh kawp reu oiz rak ne, bawnz reung dengz rak peur ya pun an naeh kaai kaang, kuanz mai, mah, kuanz, sraakz maar, tang ihz pae suamz daehz, caat ni boh caat te truz kaw bawnz phawmz cen

³¹ cen. Keuiz daz, ihz an trawng seu ni keui, waaiz an ni ngaz klaez daelz. Ihz an klaez daelz seu ni samz, waaiz an ni ngaz moh trawng.”

**Yesuhz lao teuk aacz
lawng an Daehz ngaz yam**

(Matthe 20:17-19, Lukas 18:31-34)

³² Meuz Yesuhz boh teu paez keui lan tawiz reung dengz weng Yerusalem ne, Yesuhz lan aacz ngaai keuh, teu paez Hnhz keui kaw sangz, ihz tawiz puatz keui kaw doz doz. Yesuhz raak leh teu paez seu kawlz aarz aez thatz Daehz, daz plaez lawng an ngaz naeh kaai Daehz. “Teuk ngarz raez, seu ni ehz lan weng Yerusalem. A diz, Kuanz Kingz Ihz ne ngaz klaez kaai tihz beunz caangz boh ihz mawz kyaamz keui. Keuh tatz traz aez Hnhz yam, aapz thengz Hnhz tawz ihz an nam anz kheuz Yio keui ³⁴ nahz. Keuh saehz keulz Hnhz, tiz Hnhz, teuk chuz sapz Hnhz nahz omz nyaangz, piamz thengz tang Hnhz. Keuiz daz moh waiz seu ngihz, Hnhz meu rae imz boh.”

Yakop kaar Yohn maanyz penz an mawh

(Matthe 20:20-28)

³⁵ Waaiz an diz, Yakop kaar Yohn an naeh kuanz Sebede ne, lan cu Yesuhz maanyz, “Tahz Sra, sunz aez Mih cih aez, an aaiz maanyz ne.”

³⁶ Yesuhz kaw maanyz kaar, “Sunz aez Ohz cih aez paarz nahz naehz?”

³⁷ Kaar kaw daz, “Aez aaiz bawnz keu dez kaai bunz Mih plaakz takz kaaiz hawkz, takz dahz hawkz.”

³⁸ Yesuhz daz kaar nahz, “Paarz nam mas tang daehz maanyz naehz lawh. Anz paarz tiangz bawnz klakz an Ohz ngaz tiangz? Anz paarz leh bawnz teuk sruz an Ohz ngaz leh?”

³⁹ Kaar kaw daz, “Aaiz penz bawnz boh.”

Yesuhz kaw daz, “Klakz an Ohz ngaz tiangz ne paarz ngaz bawnz tiangz, teuk sruz an Ohz ngaz leh ne paarz ngaz bawnz ⁴⁰ leh. Keuiz daz, an ngaz keu dez plaakz takz kaaiz boh takz dahz ne, Ohz nam caang aez. Phraz Pen Caoh raenz aez yaeh nahz kaw Ohz ngaz aez ihz an diz nahz.”

⁴¹ Meuz teu paez seu kawlz ngarz lawng an ni ne, keuh sunz ca Yakop kaar Yohn

⁴² nahz. Yesuhz kaw raak leh keuh daz, “Pehz mas boh ihz peur aacz keui upz peung ihz prih. Ihz mawh keui leh a na daehz pae

⁴³ suamz ihz. Keuiz daz pehz yak cih ceun diz. Ihz sunz penz an mawh ne lo cih peur

⁴⁴ cao pehz. Ihz sunz penz peur aacz ne lo

⁴⁵ penz peur cao ihz hacz aamz. Kawp daz, Kuanz Kingz Ihz truz ta cao suamz ihz nam anz, truz ta cih peur cao ihz, cunz phawmz Daehz thutz leh ihz tang heungz.”

Yesuhz seuk neum Bartimaeus ngaai bimz

(Matthe 20:29-34, Lukas 18:35-43)

⁴⁶ Meuz Yesuhz boh teu paez Hnhz keui phraeoz weng Yerikho, meuz keuh mial lae truz ne wungz ihz keui lae truz tawiz puatz

keuh, maang ihz yawng ngaai bimz hawkz, mus hnhz daz Bartimaeus, kuanz Timaeus khahz maanyz suamz boh a waar reung
⁴⁷ dengz. Meuz hnhz ngarz reu oiz Yesuhz ihz weng Nasaraet naeh a diz ne seun teungz raak daz, “Yesuhz, kuanz Khunz Dawit, teur yawng ohz raez.”

⁴⁸ Sangz daz, ihz keui nal hnhz, cao hnhz moh pras pras kaw hnhz baaiz yeung raak daz, “Yesuhz, kuanz Khunz Dawit, teur yawng ohz raez.”

⁴⁹ Yesuhz kaw deukz lao keuh, “Raak ihz an diz truz raez.”

Keuh kaw raak ihz ngaai bimz daz, “Yak phawmz kyehz. Ceng raez! Hnhz a wa raak mih.”

⁵⁰ Hnhz kaw pucz thengz cung cui daehz, ceng teuk dawtz lan cu Yesuhz.

⁵¹ Yesuhz maanyz hnhz daz, “Sunz aez Ohz cih aez mih nahz naehz?”

Ihz ngaai bimz kaw daz, “Tahz Sra, cih aez ngaai ohz awlz.”

⁵² Yesuhz kaw daz hnhz nahz, “Lan raez, reung dengz yum mih ne a wa cih aez mih rak.”

Meuz diz luat ngaai hnhz kaw a wa awlz rae lan tawiz Yesuhz tawiz reung dengz.

Ihz keui saanyz seuz meuz Yesuhz kut tuhz weng Yerusalem

(Matthe 21:1-11, Lukas 19:28-40, Yohn 12:12-19)

11 Meuz keuh ngaz phraeoz weng Yerusalem, naeh rim pruh Betphake boh pruh Bethani, naeh teungz rang Olip ne Yesuhz cao teu paez Daehz
² keu aarz lan aacz rae daz, “Lan cu pruh aacz ngaai paarz, beuk a wa phraeoz kaw paarz te awlz mahz liz kyehz, an

yaeh maat ti tumz seu pawk ne, khawz leh
³ nuarz, botz truz a niz. Beuk ihz maanyz, ‘Kawp naehz cih ceun ni a?’ daz kaw, ‘Tahz ehz lo, ehz mial truz puhz aez luat, daz ceun ni naz.’”

⁴ Kaar kaw lan awlz mahz liz tukz boh rim keu lawrz ne kaar kaw khawz leh nuarz.

⁵ Ihz teur ka an ceng boh a diz ne maanyz kaar, “Cih naehz paarz khawz nuarz mahz liz a?”

⁶ Kaar kaw tawpz daz ceun Yesuhz lao mok

⁷ ne, keuh kaw aez botz lan. Kaar botz truz cu Yesuhz, paelz kreung kaai butz mahz

⁸ liz ne, Yesuhz kaw raw tumz. Ihz keui leh kreung daehz paelz tawiz reung dengz, teur ka kaw mak kaakz Khaehz, leh lahz

⁹ paelz tawiz reung dengz. Ihz an lan aacz

Hnhz boh lan thaz puatz keui teur aacz daehz raak daz, “Hosanna. Tahz an truz tawiz mus Phraz Cen Cen ne naeh an rak.

¹⁰ Pih Khunz Dawit, ihz keu daehz keu daepz ehz, an ngaz tae ne naeh an rak se kamz. ‘Lupz phrawz Phraz Pen Caoh an naeh lang kaang raaoz.’”

¹¹ Meuz Yesuhz phraeoz weng Yerusalem ne kut tuhz wat, khahz yawt sirz sirz. Meuz seu ngihz ngaz keutz ne, Hnhz boh teu paez seu kawlz aarz keui lae lan thaz pruh Bethani.

Yesuhz kin teungz laangz wah

(Matthe 21:18-19)

¹² Ceun kap siz, keuh lae truz thaz pruh

¹³ Bethani ne Yesuhz kaw a wa coh. Meuz Hnhz moh teun yaan teuk soz awlz teungz laangz wah, lahz thaangz heungz baaiz ne, doz caang maang plaehz rae lan yawt thatz thatz. Keuiz daz kawp maat anz kraao plaehz rae nam maang plaehz, awlz

¹⁴ taw lahz hnhz pan. Hnhz kin teungz laangz wah daz, “Yak aez yaeh bawnz suamz plaehz mih seu pawk.”

Teu paez Hnhz kaw ngarz.

Yesuhz wah thengz ihz saz ihz yal a wat

(Matthe 21:12-17, Lukas 19:45-48, Yohn 2:13-22)

¹⁵ Meuz keuh phraez weng Yerusalem ne, Yesuhz kut tuhaz wat wah thengz ihz saz, ihz yal, reuk euz teuk taz pheunz ihz teur yal paekz, boh tangz keu dez ihz saz ploiz

¹⁶ keui. Lao tang yak aez yaeh leh kreung datz mial datz lan tawiz teu laangz wat.

¹⁷ Daz thaengz tang keuh nahz, “Taem mok tuhaz kyaamz lik daz, ‘Kaang Ohz ne naeh ti ihz keui suz tawngz,’ daz kaw pehz a wa cih aez hnhz penz tham konz.”

¹⁸ Ihz mawz kyaamz boh beunz caangz keui ngarz Hnhz cih ceun diz rae, kyaam piamaz Hnhz. Keuh doz Hnhz kawp daz ihz keui

¹⁹ sangz baaiz an Hnhz sawnz aez. Meuz prih reu nyeum ne, Yesuhz boh teu paez Hnhz keui lae thaz nawk weng.

Mony pung taek teungz laangz wah wiatz

(Matthe 21:20-22)

²⁰ Meuz keuh datz lan thaengz seu ngup ne, teu paez Hnhz awlz teungz laangz wah

²¹ wiatz hawngz tae leh kaanz rias. Petros tang rae daz Yesuhz nahz, “Yawt luz Tahz ehaz, teungz laangz wah an Mih kin ne a wa wiatz hawngz.”

²² Yesuhz kaw daz keuh nahz, “Pehz yum

²³ Phraz Pen Caoh lah. Ohz daz mawn pehz nahz, yak maang reung dengz thaang pleung, yum mawn rae pehz daz rang mawh ne nahz, ‘Kraai klaez sapz tuhaz omz paang laai raez,’ daz ceun ni kaw te

²⁴ klaez mawn. Kawp ceun diz Ohz daz pehz nahz, ‘Maang reung dengz yum, ceun pehz

²⁵ maanyz ne tiunz bawnz.’ Meuz pehz suz tawngz ne, beuk pehz plawiz lawt reung dengz kawi ihz kaw Paz pehz lang kaang

²⁶ raaaz kaw plawiz lawt pehz eunz.” “Beuk pehz nam plawiz lawt reung dengz kawi ihz kaw Paz pehz lang kaang raaaz kaw ngaz nam plawiz lawt pehz eunz.”

Ihz mawh yio keui maanyz

Yesuhz bawnz a na yaeh

(Matthe 21:23-27, Lukas 20:1-8)

²⁷ Meuz keuh phraez truz mial weng Yerusalem, Hnhz yeung nuar boh tuhaz wat ne, beunz caangz, ihz mawz kyaamz boh

²⁸ ihz peur aacz keui truz cu Hnhz. Keuh maanyz Hnhz daz, “Mih leh a na a naez cih keu ni? Yaeh aez Mih nahz a na keu ni cih ceun ni?”

²⁹ Yesuhz tawpz daz keuh nahz, “Ohz maanyz pehz seu meoz. Tawpz raez. Beuk pehz tawpz kaw Ohz te lao, Ohz leh a na

³⁰ yaeh cih keu ni ne. Teuk sruez an Yohn aez ne penz truz thaz Phraz haz, thaz ihz haz? Pehz tawpz an ni raez?”

³¹ Keuh wonz tuhaz phawmz daehz daz, “Beuk ehaz tawpz, penz truz thaz Phraz

daz kaw Hnhz te maanyz thaengz, cih
³²naehz pehz paw nam yum Yohn hoh? Beuk
 ehz tawpz penz truz thaz ihz daz kaw,
 ehz bawnz doz ihz. Ihz mok Yohn naeh
 ihz taangz phraz mawn.” Keuh wonz tuh
³³phawmz daehz rae, tawpz daz, “Ehz nam
 mas.”

Yesuhz kaw daz, “Ohz kaw cih ceun diz
 laai. Ohz nam lao pehz, leh a na yaeh cih
 keu ni a.”

Mony pung taek tahz sraakz seu pit

(Matthe 21:33-46, Lukas 20:9-19)

12 Yesuhz leh mony pung taek lao
 keuh nahz, “Maang ihz hawkz
 peuk seumz sraakz seu pit, lawm mok
 khaehz sraakz, kawngz lu ti teur niat
 plaehz seu pit, cih tang khrengz pao, samz
²khaatz aez ihz nahz lan prih ihz. Meuz
 kraao plaehz a wa sinz ne, hnhz plawiz
 peur cao daehz hawkz, cao lan seutz langz
³khaatz sraakz, tawz ihz khaatz sraakz. Ihz
 khaatz sraakz keui, mat tiz peur cao hnhz
⁴plawiz weng toz maat. Waaiz an diz, hnhz
 plawiz lan peur cao thaengz hawkz kaw ihz
 khaatz sraakz keui tiz kingz hnhz cih aez
⁵hnhz keu seh, plawiz weng. Tahz sraakz
 kaw plawiz lan peur cao thaengz hawkz ne
 keuh piamz thengz hnhz. Plawiz lan peur
 cao heungz baaiz kaw teur ka keuh tiz,
⁶teur ka keuh piamz thengz. Tahz sraakz
 an diz maang kuanz hawkz an daehz yaw.
 Hnhz daz, ‘keuh te nap suamz boh kuanz
 ohz,’ daz ceun ni rae plawiz kuanz daehz
⁷lan thaz puatz ihz. Keuiz daz, ihz khaatz
 sraakz keui daz, ‘Hnhz an ni naeh ihz ngaz
 bawnz caam a moi, teur aacz daehz truz

raez, piamz thengz hnhz. Beuk cih ceun
 diz, a moi an hnhz trohz bawnz ne penz
⁸khangz ehz.’ Keuh kaw piamz thengz hnhz
 mok thaz nawk khaehz sraakz.”

⁹ Yesuhz maanyz keuh, “Beuk naeh ceun
 diz, tahz sraakz ne ngaz cih seu naez?
 Hnhz truz piamz thengz ihz khaatz sraakz
 keui rae ngaz khaatz aez ihz nahz sraakz
¹⁰ne boh. Pehz maat ti bawnz rawz tuh
 kyaamz lik haz?

Reu aangz an ihz cih kaang keui
 mok thengz ne
 naeh mial reu aangz seu dukz
 thaz cawgz.

¹¹ An ni naeh lawng Phraz Cen Cen cih,
 naeh lawng rak seum sangz
 aacz ngai ehz.”

¹² Ihz peur aacz Yio keui kaw kyaam mat
 Hnhz, kawp daz Hnhz krai mony pung taek
 an ni ne sunz phaataz sapz keuh. Keuiz daz,
 keuh mok thengz Yesuhz, kawp daz keuh
 doz wungz ihz keu diz.

Lawng thaamz khawn

(Matthe 22:15-22, Lukas 20:20-26)

¹³ Ihz peur aacz Yio keui cao Pharise teur ka
 boh ihz Herot teur ka plawiz lan cu Yesuhz,
 aez daehz caang dakz khahz reung dengz
¹⁴kawi kaai mony reu ma Hnhz. Keuh lan cu
 Hnhz daz, “Tahz Sra, ehz mas boh Mih
 naeh ihz seu taehz seu wa, nam doz yaeh,
 nam thawk taw yaeh, sawnz aez reung
 dengz Phraz Pen Caoh an anz keui. An ehz
 thaamz khawn ne anz tawiz traz Yio haz?
¹⁵ Khawn khunz longz Caesar prih Rom ne
 anz ehz bawnz thaamz haz, nam haz?”
 Yesuhz mas keuh caam yawt Daehz rae

daz keuh nahz, “Cih naehz pehz sunz ceu dakz mony reu ma Ohz a? Plaez Ohz nahz ron denarius seu khlaepz luz, aez Ohz yawt.”

¹⁶ Keuh leh truz aez hawkz rae Hnhz kaw maanyz, “Kaai paekz an ni naeh raang yaeh, mus yaeh?”

Keuh tawpz daz, “Naeh khunz Caesar.”

¹⁷ Yesuhz kaw daz, “Khangz khunz kaw aez mial khunz, khangz Phraz kaw aez mial Phraz.” Keuh kaw teur aacz daehz sangz Yesuhz.

Lawng meu rae imz

(Matthe 22:23-33, Lukas 20:27-40)

¹⁸ Saduse, an naeh ihz an nam yum lawng meu rae imz keui truz cu Tahz Yesuh

¹⁹ daz, “Tahz Sra, Moses taemz mok aez ehz nahz, ‘Ihz leh yah nam maang kuanz yam lan ne, seum boh z keur meh hnhz samz bawnz leh mial mawm daehz, aez maang kuanz, yak aez ceu kheuz mai daehz dutz,’

²⁰ da. Maang kuanz mai keur meh pulz. Mai mawh keuh leh yah maat maang kuanz,

²¹ samz a wa yam. Seum boh z kapz hnhz leh mial mawm daehz, maat maang kuanz kaw yam thaengz. Seum boh z kapz hnhz samz siupz leh thaengz kaw yam boh

²² leun. Hawkz yam hawkz siupz leh kaw keuh kuanz mai teu pulz ne yam hacz aamz. Keuiz daz nam maang an nae maang kuanz. Thaz puatz dutz, keun nyah an diz

²³ kaw yam. Kraao meu rae imz ne keun nyah an diz samz penz yah yaeh? Keuh kuanz mai teu pulz ne a wa penz hacz tahz hnhz.”

²⁴ Yesuhz tawpz keuh nahz, “Pehz a wa pleung kawp daz pehz nam mas kyaamz

²⁵ lik tang taanz khoz Phraz Pen Caoh. Meuz meu rae imz ne nam maang yaeh leh tahz leh yah leui, naeh ceun teu maan kaang

²⁶ raaoz boh. Pehz nam ti bawnz rawz tuh z kyaamz Moses haz? Lawng yam meu rae imz ne, Phraz Pen Caoh lao Moses kaai yum Khaehz kat ne daz, ‘Ohz naeh Phraz Abraham, Phraz Isaac boh Phraz Yakop,’

²⁷ Hnhz naeh Phraz ihz imz, nam anz Phraz ihz yam. Kawp ceun ni rae pehz a wa pleung heungz baaiz.”

Yesuhz sawnz aez sinz an myaat lak ihz

(Matthe 22:34-40, Lukas 10:25-28)

²⁸ Maang ihz mawz kyaamz hawkz, hnhz ngarz meuz Yesuhz boh Saduse keui teur thiangez daehz. Hnhz mas Yesuhz mawz lao baaiz, sitz kut cu maanyz Hnhz, “Tuhz sinz ne an nae myaat lak ihz?”

²⁹ Yesuhz kaw daz, “Teuk ngarz raez, kheuz Israel keui. Tahz eh z an naeh Phraz Cen Cen ne, naeh Phraz Pen Caoh taw seu su

³⁰ pan. Mih lo rak Phraz Cen Cen, Phraz Pen Caoh daehz kingz keu nuasz hacz aamz, khuanz hacz aamz, phawmz hacz aamz,

³¹ keum rang hacz aamz. Sinz kaai keu aarz samz, rak ihz rim daehz ceun mih rak toz daehz. Myaat lak sinz aarz senz an ni nam maang sinz naehz leui.”

³² Ihz mawz kyaamz kaw daz, “A wa tawz baaiz Tahz Sra, Mih a wa lao an trohz keui, Phraz Pen Caoh naeh taw hawkz pan. Neuz lak Hnhz nam maang thaengz phraz leui.

³³ Mih lo rak Phraz Pen Caoh daehz kingz keu nuasz hacz aamz, nyaan hacz aamz, khuanz hacz aamz, keum rang hacz aamz. Rak ihz rim daehz ceun mih rak toz daehz.

Sinz aarz senz an ni, myaat lak toz pukz caw an tucz klawhz meoz da.”

³⁴ Yesuhz mas hnhz mawz tawpz baaiz, mial daz hnhz nahz, “Mih nam yaan prih Phraz Pen Caoh leui.”

Waaiz an diz, nam maang yaeh yaak maanyz thaengz Hnhz.

Tahz Khris mawh lak khunz Dawit

(Matthe 22:41-46, Lukas 20:41-44)

³⁵ Meuz Yesuhz sawnz aez boh tuhز wat ne, Hnhz maanyz, “Kawp naehz, ihz mawz kyaamz keui lao mok Tahz Khris naeh ³⁶kuanz khunz Dawit a? Kawp Khuanz Seu Ngamz Phraz lao khunz Dawit rae hnhz daz,

‘Phraz Cen Cen lao Tahz ehz nahz, keu dez thaz takz kaaiz Ohz raez, thonz taw Ohz leh ihz an kawi Mih keui tam mok ti tam cawng Mih.’

³⁷Toz khunz Dawit raak Tahz Khris naeh Tahz daehz kaw Tahz Khris cih seu naez penz kuanz Dawit hoh?”

Yesuhz cao ihz wiar ihz mawz kyaamz

(Matthe 23:1-36, Lukas 20:45-47)

Wungz ihz heungz keui seuz phawmz ³⁸teuk ngarz mony reu ma Hnhz. Yesuhz siupz sawnz lan thaengz, “Seu tih ihz mawz kyaamz keui raez. Keuh song seu kaeng hanz, khahz lan aarz diz, dawhz ihz tak daehz, seumz daehz, aez ihz ro

³⁹se daehz tawiz teur laas. Dawhz ti keu dez trawng tawiz pawiz, tawiz cawp keui.

⁴⁰Keuh rimz leh kreung kaang yah keu maaiz, suz tawngz aez ihz nahz hanz hanz seuk cih daehz naeh ceun ihz rak. Kawp ceun diz, keuh ngaz talz taam keu can lak ihz.”

Yesuhz lupz an yah keu maaiz lu

(Lukas 21:1-4)

⁴¹ Meuz Yesuhz keu dez aacz ngaai teuk paekz lu tuhز wat ne, Hnhz yawt ihz sapz paekz lu. Ihz maang keui sapz heungz ⁴²baaiz. Keuiz daz yah keu maaiz an phaanz samz sapz paekz tawng aarz khlaepz taan ⁴³seu metz paez ne. Hnhz raak leh teu paez Daehz daz, “Ohz daz mawn pehz nahz, yah keu maaiz an phaanz ne sapz heungz lak ⁴⁴ihz. Kawp daz ihz maang keui leh sapz taw teur nyaenz pan kaai daehz maang. Keuiz daz yah keu maaiz samz sapz hacz aamz seu hnhz maang an lo damz toz daehz.”

Yesuhz lao ihz raai keui ngaz ya thengz wat

(Matthe 24:1-2, Lukas 21:5-6)

13 Meuz Yesuhz lae truz thaz wat ne, teu pae Hnhz hawkz daz, “Yawt, Tahz Sra, reu aangz mawh reu aangz longz keui, boh kaang mawh kaang longz keui, rak seum sangz baaiz.”

² Yesuhz tawpz daz, “Mih awlz boh kaang mawh kaang longz keu ni nam anz haz?”

Kawnz reu aangz keu ni hawkz boh hawkz te nam bawnz teur takz, te bawnz luh ducz hacz aamz.”

An laak laaiz meuz kam pha ngaz lawng

(Matthe 24:3-14, Lukas 21:7-19)

³ Meuz Yesuhz naeh taw daehz lang rang Olip ne, waaiz ngaai cu wat rae, Petros, Yakop, Yohn boh Andre lan rah rah maanyz Hnhz, aez Hnhz lao plaehz daehz ⁴ nahz meuz nam maang ihz ne. “An keu diz ngaz penz truz peuk naeh? Meuz ngaz penz ne maang an laak laaiz naehz?” ⁵ Yesuhz kaw daz, “Pehz seu tih raez, yak ⁶ aez yaeh upz kaoz bawnz pehz. Kawp daz ihz tang heungz keui cih ceun naeh Ohz ne ngaz truz upz daz, ‘Ohz naeh Tahz Khri.’” ⁷ Keuh upz bawnz ihz heungz baaiz. Meuz pehz ngarz reu oiz tiukz siukz boh reu oiz phaangz ngaz tiukz siukz ne, yak ngaat. Te bawnz naeh boh ceun diz leun. Keuiz ⁸ daz, maat phraeoz ti dutz. Ihz seu kheuz boh seu kheuz, ihz seu prih boh seu prih ngaz teur tiukz. Reu yung kruhz boh an coh nguat keui kaw ngaz naeh klawhz ti. An keu ni naeh seun teungz tukz khahz peur teuk.”

Yesuhz lao teu paez Daehz ihz keui ngaz pae suamz keuh

⁹ “Pehz seu tih toz daehz. Kawp daz ihz ngaz aapz pehz tawiz rumz keui, tiz pehz tawiz cawp keui, pehz kaw ngaz bawnz ceng aacz ngaai khunz boh ihz mawh kawp Ohz, aez naeh saak se Ohz aacz ngaai

¹⁰ keuh. Co kraao maat hacz ne ngaz bawnz krai reu oiz rak kaai ihz klawhz kheuz. ¹¹ Meuz ihz mat pehz ne yak kawcz phawmz, yak wonz mok teuk aacz an pehz ngaz tawpz daz ceun nae ne. Meuz phangz an diz, pehz lo upz mony reu ma an pehz bawnz. Kawp daz, nam anz mony reu ma an pehz lao leui, naeh Khuanz Seu Ngamz ¹² lao boh. Meuz ceun diz ne kuanz mai teur deuz kaw ngaz aapz aez ihz piamz, mah paz keui aapz kuanz daehz, kuanz ihz keui kaw kawi mah paz daehz, aapz aez ihz ¹³ piamz. Ihz ngaz ceuh pehz kawp Ohz. Ihz yum klakz taw dutz ne ngaz bawnz reung dengz khyawt.”

Phez tukz khahz an mawh longz

(Matthe 24:15-21, Lukas 21:20-24)

¹⁴ “Ceun ihz taangz phraz Daniel lao mok, pehz te awlz phrihz peuk ceuh ritz ritz ne ceng boh ti hnhz nam rak seum naeh ne an ni sunz daz naehz, ihz rawz kyaamz lik an ni keui aez keuh loz phawmz. Meuz awlz ceun diz ne, ihz an naeh tuh prih Yio keui aez keuh tiunz raw lang rang. ¹⁵ Yak aez ihz an naeh lang yaal keui kut ¹⁶ leh phrihz phrahz tuhz kaang. Yak aez ihz an naeh tawiz sraakz maar keui weng leh ¹⁷ kreung kap daehz lang kaang. Meuz seu ngihz an diz kreuk baaiz ta keun nyah keun meur boh keun nyah maang kuanz buhz ¹⁸ keui nahz. Pehz suz tawngz raez, seu ngihz ¹⁹ an diz yak aez maen kaai kiarz katz. Kawp daz, seu ngihz tukz khahz peur teuk ceun diz ne, thaz meuz Phraz Pen Caoh phaan cih taw phraeoz seu ni kaw nam ti naeh

seu pawk, waaiz an ni kaw te nam naeh
²⁰thaengz leui. Beuk Phraz Cen Cen cih aez
kraao an diz nam patz kaw nam maang
yaeh lawt. Kawp ihz an ras mok keui nahz
rae cih aez kraao an diz patz.”

²¹“Meuz kraao an diz ne, beuk ihz daz
pehz nahz, ‘Tahz Khris naeh a niz, naeh
²²a tui,’ kaw pehz yak yum. Kawp daz, ihz
an plawmz cih pung Tahz Khris boh, ihz
an plawmz cih pung ihz taangz phraz keui
paw truz ne cih plaез an laak laaiz boh
an rak seum sangz keui, khantz daz caang,
kyaam upz leh tang ihz an Phraz Caoh ras
²³mok keui. Pehz seu tih toz daehz raez. Co
maat phraeoz ne, Ohz a wa lao mok teuk
aacz lawng keu ni hacz aamz.”

Kuanz Kingz Ihz ngaz mial truz

(Matthe 24:29-31, Lukas 21:25-28)

²⁴“Waaiz kraao seu ngihz peur teuk ne, seu
ngihz ngaz bimz, kiarz kaw ngaz nam aez
²⁵an thaangz. Seuk muny lang plengz keui
ngaz kur, taanz khoz lang plengz keui ngaz
²⁶keusz. Meuz ceun diz pehz ngaz bawnz
awlz Kuanz Kingz Ihz tang bunz boh taanz
khoz an mawh ne tumz truz peu eumz.
²⁷Meuz ceun diz Hnhz cao teu maan kaang
raaoz Daehz, raak teur cuhz ihz an Phraz
Pen Caoh ras mok kaanz prih keu teh
hacz aamz taw phraeoz lang plengz hacz
aamz.”

Mony pung taek teungz laangz wah

(Matthe 24:32-35, Lukas 21:29-33)

²⁸“Pehz yawt leh nahz teungz laangz wah
raez. Pehz mas boh, beuk kaakz laangz
wah plung, maang lahz run kaw a wa thatz
²⁹kiarz kawcz. Naeh ceun khuz an diz, beuk
pehz awlz lawng keu diz kaw, pehz lo mas
kraao Kuanz Kingz Ihz mial truz ne a wa
³⁰thatz baaiz rim keur wah. Ohz daz mawn
pehz nahz, co ihz keu ni maat dutz ne
lawng keu ni ngaz penz truz hacz aamz.
³¹Plengz boh keu tehz luh kaw, mony reu ma
Ohz nam luh.”

Nam maang ihz mas seu ngihz an diz boh kraao an diz

(Matthe 24:36-44)

³²“Neuz lak Paz Phraz, yaeh nam mas seu
ngihz an diz boh kraao an diz, teu maan
kaang raaoz kaw nam mas, Kuanz kaw nam
³³mas. Pehz nam mas seu ngihz an diz ngaz
phraeoz truz peuk naeh rae, seu tih toz,
³⁴dangz toz pao raez. Naeh ceun ihz hawkz,
meuz hnhz lae nawk prih ne khaanz mok
kuanz leng keui nahz kaanz klawhz ihz. Lao
tang ihz pao keur wah aez ngawm yawt.
³⁵Tahz kaang ngaz weng truz teuk borz haz?
Khinz sawmz haz? Meuz yaerz keu dawrz
haz? Teuk ngup haz? Kawp daz nam mas
³⁶rae teur aacz daehz pao. Beuk nam pao

ceun diz, tahz kaang ne weng truz teuk khranz rae doz maen meuz phangz pehz ³⁷yaetz reuk ngeut. Teur aacz daehz pao raez, ceun Ohz lao pehz ne, Ohz lao ihz nahz hacz aamz.”

**Ihz peur aacz yio keui
kyaam piamz Yesuhz**

*(Matthe 26:1-5, Lukas
22:1-2, Yohn 11:45-53)*

14 Moh thaengz aarz seu ngihz, maang pawiz kaaiz mun nam maang ceu boh pawiz lawt phez, beunz caangz boh ihz mawz kyaamz keui teur lao daehz ngaz dawmz mat Yesuhz kyaam ²piamz Hnhz. Keuiz daz, keuh doz ihz keui ronyz raeteur daz daehz nahz, “Yak maat cih kaaiz seu ngihz pawiz.”

**Keun nyah hawkz leh nam man
hawm thawkz kaaiz kingz Yesuhz**

(Matthe 26:6-13, Yohn 12:1-8)

³ Meuz Yesuhz naeh pruh Bethani kaang Simon ihz tut, meuz diz ne maang keun nyah hawkz leh truz nam man hawm caet caet an langz mawh baaiz, seu teur dawngz reu aangz keun ra. Meuz Yesuhz suamz boh ne tiz teuk haakz teur dawngz, ⁴thawkz sapz kaaiz kingz Hnhz. Ihz teur ka kaw ca, teur daz daehz nahz, “Cih naehz ⁵lah, aez nam man sumz maat maat a? Saz paekz ron waiz peur ya pyaz, rak seum aez ihz phaanz keui nahz.” Keuh nae tang keun nyah ne cih pleung.

⁶ Yesuhz kaw daz, “Teungz mah hnhz raez, yak ya hnhz. Hnhz a wa cih an rak kaaiz

⁷ Ohz. Ihz phaanz keui naeh kawmz pehz se se. Teur pehz sunz kawr ne kawr keuh meu naeh kaw bawnz. Ohz samz nam naeh ⁸kawmz pehz se se. Keun nyah an ni cih aez Ohz nahz seu hnhz penz bawnz, ngaz saangz keo toz Ohz rae thukz aez nam man ⁹hawm kaaiz toz Ohz. Ohz daz mawn pehz nahz, khahz krai reu oiz rak tawiz prih keu tehz ne ngaz bawnz krai boh lawng keun nyah an ni aez naeh ta seum tang ihz.”

Yudas ngaz saz Yesuhz

(Matthe 26:14-16, Lukas 22:3-6)

¹⁰ Meuz phangz an diz, Yudas an naeh tuhuz seu kawlz aarz ne lan cu beunz caangz keui ¹¹saz kokz Tahz Yesuhz. Meuz keuh ngarz ne, rawhz seuz baaiz rae, aez keu tih daz, ngaz aez hnhz nahz paekz. Waaiz an diz, Yudas ngawm kraao sang trohz ngaz saz kokz Hnhz ceun nae ne.

Pawiz Caoh Phraz

*(Matthe 26:17-25, Lukas
22:7-14,21-23, Yohn 13:21-30)*

¹² Kaaiz seu ngihz hawkz pawiz kaaiz mun nam maang ceu boh pawiz lawt phez ne, teu paez keui truz cu Hnhz maanyz daz, “Ngaz lan raenz aez a naez ta Tahz ehz suamz pawiz lawt phez a?”

¹³ Tahz Yesuhz cao teu paez Daehz keu aarz, “Paarz kut tuhuz weng ne te awlz ihz ¹⁴leh truz omz. Lan tawiz hnhz, kut tawiz hnhz tuhuz kaang raez. Maanyz tahz kaang an hnhz kut ne daz, ‘Tahz Sra ehz lao, lukz suamz pawiz lawt phez Ohz boh teu paez

¹⁵Ohz keui naeh a naez?’ Ihz an diz, ngaz lao

plaez paarz nahz lukz mawh an naeh raan thaz kol ne, raenz ehz nahz a diz eu.”

¹⁶ Teu paez keui kaw kut lan tuhz weng ne, awlz ceun Hnhz lao, raenz pawiz lawt phez a diz.

¹⁷ Meuz teuk borz ne Yesuhz boh teu paez

¹⁸ seu kawlz aarz keui truz teur tawiz. Meuz keu dez kaai tangz suamz boh ne, Yesuhz daz, “Ohz daz mawn pehz nahz, ihz hawkz an naeh tuhz pehz, suamz kawmz Ohz ne ngaz saz kokz Ohz.”

¹⁹ Teu paez keui kaw phawmz kyehz teur aacz daehz maanyz Hnhz, hawkz a wa hawkz maanyz, “Naeh ohz haz?”

²⁰ Yesuhz lao tawpz keuh nahz, “Ihz hawkz an naeh tuhz seu kawlz aarz, an nyuh kawmz Ohz tuhz sroz ne ngaz saz kokz

²¹ Ohz. Kuanz Kingz Ihz ne ngaz bawnz yam ceun taemz mok tuhz kyaamz. Keuiz daz, ihz an saz kokz Ohz ne ngaz talz phez mawh. Ihz an diz, khanz yak keut truz baaiz rak.”

**Yesuhz seun teungz aacz
cih pawiz Caoh Phraz**

*(Matthe 26:26-30, Lukas
22:14-23, 1 Korin 11:23-25)*

²² Meuz suamz boh teuk bimz ne Yesuhz leh kaaiz mun, taang kez cuz Phraz Pen Caoh pekz kaaiz mun aez keuh nahz, “Teur aacz daehz leh suamz raez, kaaiz mun an ni naeh toz Ohz.”

²³ Tawnz tang klakz omz seu pit taang kez cuz Phraz Pen Caoh aez keuh nahz, keuh

²⁴ kaw teur aacz daehz leh tiangz. Yesuhz daz, “An ni naeh naamz Ohz an thawkz aez ihz keui nahz, naeh kaai traz an prawm

²⁵ teun mehz. Ohz daz mawn pehz nahz, tae leh seu ni, thonz taw seu ngihz Ohz tiangz omz seu pit teun mehz tuhz prih Phraz Pen Caoh ne, Ohz nam tiangz leui.”

²⁶ Waaiz an diz, keuh keun euiz lae lan cu thaz rang Olip.

**Yesuhz lao aacz Petros ngaz
thiangz thengz Daehz**

*(Matthe 26:31-35, Lukas
22:31-34, Yohn 13:36-38)*

²⁷ Yesuhz daz keuh nahz, “Borz meu ni pehz ngaz mok thengz Ohz, naeh ceun tuhz kyaamz lik daz, ‘Ohz piamz ihz damz

²⁸ soz, soz keui ngaz baak beuz.’ Keuiz daz, Ohz meu rae imz rae, lan aacz pehz prih Kalile.”

²⁹ Petros daz, “Sangz daz ihz keu ni mok thengz Mih kaw, ohz nam thengz.”

³⁰ Yesuhz daz mawn hnhz nahz, “Borz meu ni, co yaerz maat keu dawrz aarz laehz ne, mih ngaz daz daehz nam mas Ohz.”

³¹ Petros kaw daz mawn mawn, “Sangz daz, ohz bawnz yam kawmz Tahz ehz kaw, ohz nam tiangz thengz.”

Keuh kaw teur aacz daehz daz boh ceun diz leun.

**Yesuhz suz tawngz tawz
sraakz Ketsemane**

(Matthe 26:36-46, Lukas 22:39-46)

³² Keuh lan phraez tawz ti Ketsemane ne Yesuhz lao teu paez daehz keui nahz, “Co Ohz suz tawngz ne pehz keu dez ngawm

³³ a niz raez.” Hnhz raak Petros, Yakop boh Yohn aez lan tawiz Daehz, Hnhz phawmz

³⁴ kawcz phawmz doz. Hnhz daz keuh nahz, “Phawmz Ohz rawhz khin baaiz raenz yam, pehz keu waiz pao Ohz a niz raez.”

³⁵ Peun lan a diz nyaenz awh, Hnhz kupz kaai keu tehz, suz tawngz daz, “Beuk caang kaw, peur teuk an ni aez peun lan

³⁶ Ohz se kamz.” Yesuhz daz, “Oz Paz, Paz! Mih cih penz bawnz klawhz meoz. Kraai thengz aez klakz peur teuk an ni. Keuiz daz, yak aez naeh ceun Ohz sunz penz, aez naeh ceun Mih sunz penz.”

³⁷ Hnhz mial truz cu meu rae teu paez Daehz keu waiz ne awlz keuh yaetz reuk ngeut boh, Hnhz daz Petros nahz, “Simon, mih yaetz reuk ngeut haz? Pao seu seu

³⁸ na ri kaw mih nam penz bawnz haz? Suz tawngz raez, yak aez pehz bawnz lan tawiz reung dengz kawi keui khyawz leh daehz. Phawmz khuanz ne maang boh keum rang

kaw, toz samz caang keu ceum.”

³⁹ Mial lan thaengz ti Hnhz suz tawngz ne suz tawngz mial ceun Hnhz a wa maanyz.

⁴⁰ Waaiz an diz, mial truz cu teu paez Daehz kaw awlz keuh yaetz reuk ngeut thaengz boh kawp daz, ngaai keuh keu can, keuh nam mas ngaz bawnz tawpz Hnhz nahz ceun nae.

⁴¹ Hnhz mial truz cu keuh waiz laehz rae daz keuh nahz, “Pehz yeung yaetz reuk ngeut boh haz? Rawi leuk raez, ehz ngaz lan. Yawt raez. Kraao leh Kuanz Kingz Ihz aapz thengz tuhz tihz ihz raai ne a wa phraeoz.

⁴² Ceng leuk lah. Ehz lan. Pehz awlz boh nam

anz haz? Ihz an saz kokz Ohz ne a wa truz phraeoz.”

Yudas aapz Yesuhz

(Matthe 26:47-56, Lukas

22:47-53, Yohn 18:3-12)

⁴³ Meuz Hnhz daz boh ceun diz ne, Yudas, an naeh tuhz seu kawlz aarz ne truz phraeoz. Beunz caangz, ihz mawz kyaamz boh ihz peur aacz keui cao ihz daehz keui khaenz tang waac, tang kawn truz tawiz

⁴⁴ Yudas. Ihz an saz kokz Hnhz ne lao mok peun tang keuh nahz, “Ihz an ohz kuny ne naeh Yesuhz keuiz, mat Hnhz leh lan yawt rak rak lah.”

⁴⁵ Meuz Yudas phraeoz truz ne lan cu luat tawz Hnhz daz, “Tahz Sra, Tahz Sra.” daz

⁴⁶ rae kuny Hnhz. Keuh kaw takz mat Hnhz.

⁴⁷ Meuz phangz an diz ihz hawkz an ceng boh rim keuh ne truatw waac daehz mak peur cao ceu beunz, keu tiakz hnhz seu plaakz

⁴⁸ paw teutz. Yesuhz daz keuh nahz, “Pehz khaenz waac, khaenz kawn mat Ohz, naeh

⁴⁹ ceun ihz mat konz. Klawhz seu ngihz meuz Ohz naeh boh peur lah pehz, sawnz aez tuhz wat ne, pehz paw nam mat Ohz. An ni

aez tuhz kyaamz lik ne neuk truz rae penz ceun ni.”

⁵⁰ Meuz phangz an diz, teu paez Hnhz keui tiunz thengz Hnhz.

⁵¹ Maang ihz plung hawkz nam kap kreung, seu kum taw pahz pan, lan tawiz puatz

keuh, ihz keui kaw kyaam mat tang hnhz.
⁵²Hnhz kaw plawiz thengz pahz daehz, tiunz kulz kaalz toz maat.

Ihz caetz Yesuhz

(*Matthe 26:57-68, Lukas 22:54-55, 22:63-71, Yohn 18:13-14, 18:19-24*)

⁵³ Keuh leh Yesuhz lan cu ceu beunz, beunz caangz keui, ihz peur aacz keui, ihz mawz kyaamz keui kaw lan teur cuhz a diz.
⁵⁴ Petros moh raamz yaan lan tawiz Hnhz, phraeoz teu laangz hawz ceu beunz ne hnhz tatz ngal keu dez teur kawmz ihz
⁵⁵ khunz keui. Beunz caangz boh ihz mawh rumz keui khahz saak se reung dengz kawi
⁵⁶ ngaz piamz Hnhz, keuz daz nam awlz. Ihz keui teur aacz daehz lao plaiez kaw keuh eunz nam teur anz daehz.
⁵⁷ Teur ka kaw ceng lao an nam anz ne daz,
⁵⁸ “Ehz a wa ngarz Hnhz daz, ‘Ohz ya wat an leh tihz ihz cih, moh waiz seu ngihz tae thaengz hawkz an nam leh tihz ihz cih
⁵⁹ boh.’” Keuz daz, keuh daz thanz teur diz kaw, keuh eunz nam teur deuz.
⁶⁰ Ceu beunz ceng aacz ngaai keuh rae, maanyz Hnhz daz, “Mih nam tawpz naehz leui haz? Keuh maaf sapz reung dengz kawi Mih thanz teur ni a?”
⁶¹ Keuz daz Yesuhz moh pras pras, nam tawpz seu khaw khaw. Ceu beunz kaw maanyz thaengz, “Anz Mih naeh Tahz Khris kuanz Phraz Pen Caoh an rak ne hoh?”
⁶² Yesuhz kaw daz, “Anz. Waaiz an ni, pehz te bawnz awlz Kuanz Kingz Ihz ne keu dez thaz takz kaaiz Phraz taanz khoz mawh tumz truz peu eumz.”

⁶³ Ceu beunz kaw siarz thengz kreung daehz daz, “Lo thaengz saak se naehz
⁶⁴ leui? Pehz a wa ngarz mony reu ma Hnhz upz leuz Phraz Pen Caoh. Pehz thaang ceun nae hoh?”

Keuh kaw daz, “Hnhz a wa trohz yam.”
⁶⁵ Meuz diz, ihz teur ka teuk chuz sapz Hnhz nahz omz nyaangz. Bitz ngaai Hnhz, leh keu neumz tihz phak rae daz, “Lao raez, yaeh cih Mih?” Ihz khunz keui kaw tiz keu taep Hnhz.

Petros thiangz thengz Yesuhz

(*Matthe 26:69-75, Lukas 22:56-62, Yohn 18:15-18, 18:25-27*)

⁶⁶ Meuz Petros naeh tawiz teu laangz hawz ne maang keun nyah hawkz, an naeh peur
⁶⁷ cao ceu beunz truz cu hnhz, awlz Petros tatz ngal, yiang yawt hnhz daz, “Mih naeh boh raen Yesuhz ihz weng Nasaraet long.”
⁶⁸ Petros kaw tawpz thiangz daz, “Ohz nam mas an mih daz ne.” A wa daz kaw hnhz lae lan thaz keur wah ne yaerz kaw keu dawrz.
⁶⁹ Moh thaengz nyaenz, keun nyah an diz awlz Petros ne daz ihz an naeh rim daehz keui nahz, “Hnhz an ni naeh cumz
⁷⁰ keuh hawkz.” Petros kaw thiangz thengz thaengz.
 Moh seu co, ihz ceng boh a diz ne daz Petros nahz, “Mih anz mawn cumz keuh keuz, mih kaw naeh ihz prih Kalile.”
⁷¹ Petros kaw teung kaa mial toz daehz daz, “Ohz nam mas ihz an mih lao ohz.”
⁷² Meuz diz luat, yaerz kaw keu dawrz thaengz. Petros kaw kuiz kingz daehz yaam, kawp hnhz tang mony reu ma

Yesuhz lao mok daehz daz, “Co yaerz maat keu dawrz aarz laehz ne, mih ngaz thiangez thengz Ohz waiz laehz.”

Khunz Pilat caetz Yesuhz

(*Matthe 27:1-2, 27:11-14, Lukas 23:1-5, Yohn 18:28-38*)

- 15** Meuz teuk ngup cao cao ne beunz caangz keui, teur lao tang ihz peur aacz, ihz mawz kyaamz boh ihz mawh Yio aarz diz keui mat Yesuhz lan phuiz aez Khunz Pilat nahz. Khunz Pilat maanyz Yesuhz daz, “Mih naeh Khunz Yio haz?”
- Hnhz kaw lao daz, “Naeh ceun mih maanyz ne.”
- ³ Beunz caangz keui teur aacz daehz maap
- ⁴ Hnhz paw keunyz. Khunz Pilat kaw maanyz thaengz, “Mih nam lao mial naehz leui haz? Mih yawt luz, ihz maap Mih paw keunyz.”
- ⁵ Yesuhz kaw nam tawpz hawgz hawgz, Khunz Pilat kaw sangz baaiz.

Ihz piamz Yesuhz

(*Matthe 27:15-26, Lukas 23:13-25, Yohn 18:39-19:16*)

- ⁶ Tuhz pawiz lawt phez klawhz wit ne khunz Pilat tomz plawiz plaetz ihz klaez
- ⁷ thang teun akz, an ihz keui maanyz. Meuz phangz an diz, maang ihz hawgz, mus hnhz daz Barapbas, piamz ihz meuz hnhz seuk weur tiukz meu rae prih ne, klaez thang teur kawmz tang boh z raen daehz keui.

- ⁸ Ihz keui teur cuhz daehz raak maanyz khunz Pilat, aez hnhz cih ceun hnhz tomz
- ⁹ cih klawhz pawk ne. Khunz Pilat maanyz keuh nahz, “Pehz sunz aez ohz plawiz
- ¹⁰ khunz Yio hiuz?” Kawp daz, hnhz mas beunz caangz keui seu ke Yesuhz rae caang aapz aez daehz nahz.
- ¹¹ Beunz caangz keui lao srawz srawz, aez
- ¹² ihz keui cao khunz plawiz Barapbas. Khunz Pilat kaw maanyz thaengz keuh nahz, “Pehz sunz aez ohz cih seu naez kaai ihz an pehz raak daz khunz Yio ne hoh?”
- ¹³ Keuh teur aacz daehz raak daz, “Tawgz piamz Hnhz kaai lakz klawngz klaengz raez.”
- ¹⁴ Khunz Pilat kaw daz thaengz keuh nahz, “Kawp naehz? Hnhz cih kawi naehz?”
- Meuz khunz maanyz ceun ni ne keuh baaiz yeung raak daz, “Tawgz sapz Hnhz kaai lakz klawngz klaengz raez.”
- ¹⁵ Khunz Pilat kaw plawiz Barapbas aez phre phawmz keuh. Hnhz cao ihz leh nuarz rotz Yesuhz, aapz aez keuh tawgz piamz Hnhz kaai lakz klawngz klaengz ne.

Siukz Rom keui nyao peuk pyaak Yesuhz

(*Matthe 27:27-31, Yohn 19:2-3*)

- ¹⁶ Siukz keui leh lan Yesuhz cu teu laangz
- ¹⁷ hawz rae raak truz siukz hacz aamz. Keuh kap aez Hnhz nahz cung cuieurz, leh seur keutz cih tong, supz aez kaai kingz Hnhz.
- ¹⁸ Siukz keui daz Hnhz nahz, “Khunz Yio ne
- ¹⁹ aez a saak hanz se kamz.” Keuh leh kawmz teur law tiz kingz Hnhz, teuk chuz sapz

15:17 kreung eurz boh paanz kumz ne sunz daz naeh kreung kap khunz. Keuh cih kaai Yesuhz ceun diz ne naeh ta keuh saehz keulz.

Hnhz nahz omz nyaangz, seuk deumz waiz
²⁰Hnhz. Waaiz keuh cih peuk pyaak ceun diz
 ne, keuh mial pucz seu kaeng eurz, mial
 kap aez kreung Hnhz kaw leh lan tawkz
 sapz kaai lakz klawngz klaengz.

**Siukz leh Yesuhz tawkz kaai
 lakz klawngz klaengz**

*(Matthe 27:32-44, Lukas
 23:26-43, Yohn 19:17-27)*

²¹ Siukz keui awlz Simon, ihz prih Siren,
 an naeh paz keuh Alesandar kaar Ruphus,
 tawiz reung dengz ne keuh peun pae hnhz,
 cao hnhz baekz lakz klawngz klaengz.
²²Keuh leh lan pukz Kolkotha, an loz daz,
²³pukz klakz kingz. Keuh leh aez Hnhz nahz
 omz seu pit an seuk rah mok mar hawm
²⁴kaw Hnhz nam tiangz. Tawkz Hnhz kaai
 lakz klawngz klaengz, teur aacz daehz
 pohz ceu kaw, teur baengz leh kreung
²⁵Hnhz. Kraao timz na ri teuk ngup ne, keuh
 leh Hnhz tawkz kaai lakz klawngz klaengz.
²⁶Lik an maaf Hnhz taemz mok daz, “Khunz
²⁷kheuz Yio.” Keuh tawkz mok tang conz keu
 aarz ihz teur lakz, plaakz takz dahz Hnhz
²⁸hawkz, takz kaaiz Hnhz hawkz. “Hnhz an
 ni bawnz nap sapz teur kawmz tang ihz
 raai keui,” an daz mok tuh kyaamz lik ne,
 a wa neuk truz meuz diz.
²⁹ Ihz lan tawiz reung dengz keui krasz
 kingz daehz, saehz daz tang Hnhz nahz,
 “Euz, Ihz an ngaz ya wat, moh waiz seu
³⁰ngihz mial cih meu rae ne, cur truz thaz
 lakz klawngz klaengz raez, khyawt mial toz
 Daehz raez.”
³¹ Beunz caangz boh ihz mawz kyaamz
 keui kaw daz, “Hnhz an ni khyawt bawnz
³²ihz, nam khyawt bawnz toz daehz.” Keuh
 saehz Hnhz daz, “Aez ehz awlz, aez ehz

yum ne khunz Israel an naeh Tahz Khris,
 cur truz thaz lakz klawngz klaengz seu ni
 raez.”

Ihz keu aarz an tawkz teur kawmz kaai
 lakz klawngz klaengz kaw saehz Hnhz.

Yesuhz yam

*(Matthe 27:45-56, Lukas
 23:44-49, Yohn 19:28-30)*

³³ Meuz seu ngihz keun cang ne prih bimz
 hacz aamz thonz taw waiz na ri teuk borz.
³⁴Meuz teuk borz waiz na ri ne Yesuhz
 raak reus usz usz daz, “Eloi, Eloi, lama
 sabacthani?” an loz daz, “Phraz Ohz,
 Phraz Ohz, kawp naehz lah Mih caang
 plawiz thengz Ohz a?”
³⁵ Ihz an ceng boh a diz teur ka keui ngarz
 reus Hnhz raak daz, “Teuk ngarz raez,
³⁶Hnhz raak Eliyas eu.” Meuz ceun diz,
 maang ihz hawkz, leh an naeh ceun paaiz
 seu keu neumz nyahz sapz tuh omz seu
 pit praang. Hawiz kaai cawz kaw teur
 law, aez Hnhz nahz. Keuh teur daz daehz
 nahz, “Ehz pao yawt, Anz Eliyas ngaz truz
 khyawt Hnhz.”
³⁷ Yesuhz raak keurz reus usz rae plotz
 phawmz.
³⁸ Meuz ceun diz, pahz kangz tuh wat ne
 seuk siarz thaz kol taw thaz wa, penz aarz
³⁹plaakz. Meuz ihz mawh siukz ceng boh
 aacz ngaai Hnhz ne awlz Yesuhz raak reus
 usz phawmz hacz lan rae daz, “Hnhz an ni
 naeh mawn Kuanz Phraz Pen Caoh.”
⁴⁰ Keun nyah teur ka moh teun yaan pao
 teuk soz yawt. Keun nyah keu diz naeh
 Mari Makdalen, Mari mah Yakop kyezh
⁴¹kaar Yoses, tang Salome. Keun nyah keu
 diz naeh ihz cih damz Yesuhz, meuz Hnhz
 yeung naeh prih Kalile ne. Pa thaengz tang

keun nyah an truz tawiz Hnhz kut tuhz weng Yerusalem.

Yosep saangz keo Yesuhz

(*Matthe 27:57-61, Lukas 23:50-56, Yohn 19:38-42*)

⁴² Seu ngihz an diz maen kaai seu ngihz
⁴³ phit, meuz teuk borz ne, Yosep ihz weng Arimathea, an naeh ihz mawh, ihz nap suamz ne kawp daz hnhz mang prih Phraz Pen Caoh rae kut cu yaak yaak tawz khunz
⁴⁴ Pilat ne, maanyz toz yam Yesuhz. Khunz Pilat kaw khranz kawp mas Yesuhz a wa yam rae, aez daehz bawnz mas caem caem anz Hnhz yam mawn ne raak maanyz ihz
⁴⁵ mawh siukz. Mas Hnhz a wa yam mawn kaw aez Yosep nahz toz yam Yesuhz.
⁴⁶ Yosep leh teuk klaez toz yam Yesuhz, wian aez Hnhz nahz banz an daehz yal truz, mok tuhz peun lu an ihz kawngz mok tawiz pha laan. Leh reu aangz mawh kling bitz mok
⁴⁷ tuhz tham an diz. Mari Makdalen boh Mari mah keuh Yoses kaw yawt ti mok toz yam.

Yesuhz meu rae imz

(*Matthe 28:1-8, Lukas 24:1-12, Yohn 20:1-10*)

16 Waaiz seu ngihz sinz ne, Mari Makdalen, Mari mah keuh Yakop, boh Salome keui, keuh yal lan omz hawm
² ngaz thukz toz yam Yesuhz. Naeh kaai seu ngihz seun teungz tuhz wong pulz seu ngihz, teuk ngup cao, meuz seu ngihz lae
³ ne keuh lan a peun lu. Keuh teur daz daehz nahz, “Yaeh ngaz kling plaez aez ehz nahz reu aangz an bitz tuhz peun lu ne hoh?”
⁴ Meuz keuh yawt reu aangz ne a wa peun kling plaez mok. Reu aangz an diz mawh

⁵ baaiz. Keun nyah keu diz kaw kut yawt tuhz peun lu, keuh awlz ihz plung hawkz kap tang seu kaeng keun ra hanz, keu dez boh thaz takz kaaiz ne rae keuh teur aacz daehz khranz.

⁶ Hnhz daz keun nyah keu diz nahz, “Yak khranz, pehz khahz Yesuhz, ihz weng Nasaraet, an ihz tawgz piamz kaai lakz klawngz klaengz. Hnhz a wa meu rae imz. Hnhz nam naeh a niz leui, yawt ti mok toz
⁷ yam Hnhz luz. Pehz lan lao Petros boh teu paez keu diz nahz raez. Hnhz a wa lan aacz pehz prih Kalile tui. Ceun ohz lao ne pehz te awlz boh Hnhz.”

⁸ Keun nyah keu diz tang khranz, tang teur ceus lae truz thaz tuhz peun lu rae wang lan. Kawp keuh doz rae nam lao yaeh nahz naehz.

Yesuhz paw truz aacz ngaai Mari Makdalen

(*Matthe 28:9-10, Yohn 20:11-18*)

⁹ Yesuhz meu rae imz teuk ngup cao, kaai seu ngihz hawkz, tuhz wong pulz seu ngihz ne, paw plaez aacz toz Daehz tawz Mari Makdalen, an phiz lae kaai hnhz teu pulz
¹⁰ ne. Mari kaw lan lao plaez ihz an tomz cih boh raen Yesuhz keui nahz, meuz keuh
¹¹ khiz ngaoz yaam boh ne. Meuz keuh ngarz ne keuh nam yum lawng Yesuhz meu rae imz boh, lawng Mari awlz toz Hnhz.

Yesuhz cao khahz lao reu oiz rak

(*Matthe 28:16-20, Lukas 24:36-49, Yohn 20:19-23, Teu Maan Caoh 1:6-8*)

¹² Waaiz an diz, Yesuhz cih toz Daehz pleung rae paw truz tawz teu paez Daehz keu arz nahz, meuz kaar nuar lan cu pruh

- ¹³ ne. Kaar kaw weng truz lao teu paez keu diz nahz kaw keuh nam yum.
- ¹⁴ Waaiz an diz, Yesuhz paw truz plaez toz Daehz tawz teu paez seu kawlz disz, meuz keuh yeung suamz boh ne. Yesuhz nae keuh, sangz daz ihz an a wa awlz Hnhz keui lao plaez keuh nahz kaw kawp kingz keu
- ¹⁵ nuasz keuh tanz rae keuh nam yum. Hnhz seumz lao keuh nahz, “Lan tuhz prih keu teh z sirz sirz, lao aez reu oiz rak kaai ihz
- ¹⁶ nahz klawhz ihz. Ihz an yum rae leh teuk sruz ne bawnz reung dengz khyawt. Ihz an nam yum samz bawnz talz taam reung
- ¹⁷ dengz kawi. Ihz an yum keui naeh a naez kaw, penz an laak laaiz a diz, leh mus Ohz ngaz wah thengz phiz keui, ngaz upz mony
- ¹⁸ reu ma pleung pleung keui, keuh ngaz takz bawnz heunyz keui, suamz seum suamz an maang keu cawh caang yam ihz kaw nam teu keuh, leh tihz taangz lang kol ihz nam moh rak, cih aez keuh moh rak truz.”

Yesuhz raw lang kaang raaoz

(Lukas 24:50-53, Teu Maan Caoh 1:9-11)

- ¹⁹ Waaiz Tahz Yesuhz seumz lao teu paez Daehz keui nahz ceun diz ne, khaam leh raw lang kaang raaoz, keu dez thaz plaakz
- ²⁰ takz kaai Phraz Pen Caoh. Teu paez keui kaw khahz rawz reu oiz rak klawhz ti, Yesuhz kaw kawr keuh cih an laak laaiz keui rae penz saak se an anz kaai mony reu ma Phraz Pen Caoh.

MARKUS A WA DUTZ.

9. Keun nyah keu diz lan cu Petros boh teu paez Hnhz keui rae, lawng an lao mok keuh klawhz khaw ne, lao aez an patz keui pan.

10. Waaiz an diz, Yesuhz cao teu paez Daehz keui aez keuh rawz taangz toz Daehz reu oiz rak Phraz Pen Caoh an seu ngamz boh traz khyawt ta klawhz co ne tawiz prih keu teh z cawk thaz reu lae taw dutz cawk thaz reu keutz.

Kyaamz Markus a wa dutz.